

Mark ts'edinh destl'es ?alagh ?eyen John Mark chuh ts'edinh haghint'i. ?Eyen destl'es ch'ed Sizi ya nagwelnig ?ech'ede?ezjez. Sizi denilin, Mark chuh yeghad denilin haghint'i gan lha yaš'in tesaghint'i. Peter ya ?eguh gwalnish ?egu destl'es ch'ed jidagwedilah ts'edenish. Sizi jeyudidlan gats'in Mark belghedex chuh jeya'in hajaghint'i. Mark beban bequngh xents'ajegult'ish gweqa ?egun nanats'adilh.

Paul, Sizi ya nagwelnig ?eguh nayah ?egu ?aghatsel Mark ?eyen Paul yelh?anat'in gweqa yelhnašiyah.

Sizi ch'adejagh hink'an nagušdiny ch'iz tad ?elhch'ažnan xi gwežlin tesanh ?egu Mark Sizi ya nagwelnig destl'es ?alagh.

Mark Jews ?inlhanx helin, ?ets'en deni Rome gwet'in guba Sizi ya nagwelnig destl'es ?alagh ts'edenish. Deni belhdan Sizi jeyudidlan gwech'ez gunchagh jid lha guts'ut'in, ?eguh chuh Mark deni ?iguwelhnish gušt'in. Mark destl'es ?alagh ?eyi bech'eyats'elhtig ?eguh jid Sizi ts'uduwedlanx gweqa haghet'in. Destl'es bech'ed, nendideqa Sizi ch'adejagh, xulht'i jid Sizi deni jeyudidlan sex jigubedaghinh'in ?eguh tah destl'es ch'ed gagwedinh. Sizi nexwilht'ih deni helin haghint'i hink'an Gudinits'il'in helin chu?ant'ih haghint'i.

1

Mark Sizi yanagwetilhig. John deni ?igwedetilh'in, Sizi heyash gwech'an danh hadaghini.

¹ Su ?ech'an Gudinits'il'in beyi Sizi Kri su ta?anašt'in banagwetasnig. ² Yedanx danh Isaiah ts'edaghini Gudinits'il'in ya deni tuwh xagwelnig, ?eyen destl'es gwech'ede?ezjez gwech'ed nenduwg gagwedinh: "Gudinits'il'in nenduwg gadinh: 'Sech'an ?inlhanx denituwg xaŵeya gweqa gwetl'atastilh, ?eyen

gangu sutsel sa ?eten xengwedilagh gatanilh." 3 ""?Eyen sa tintex ?egun bejeni bid denilh yatalhtig, 'Tayalh ?eyen bedud xenduht'i, gangu ba ?eten ts'idaneš gwezelhtsin ga?wehnax."

⁴⁻⁶ John deni tubi?alh?insh ?eyen hayelhdaghini tintes niyah ?egun tubi?agubelh?insh. ?Eyen guyi nulh camel ts'edinh begha ts'ežtl'on ?eyi ts'enz yedit'in. ?Eyi bech'ed ši ?eqelh bet'ah jišelhchež. Gunlht'osh xutih yelhtsish gant'i belh tsanlhch'inh dzanh yet'ad denilin. Nenduw h gagubelhdenish, Tubi?anexwets'etalilh hink'ed ?anananentaht'anx gwech'an nadežehyah gagwetat'ilh ?egu Gudinit's'il?in guntsen nexwanagweta?alh. Deni lhan niyax nen Judea belh qwentex Jerusalem ts'egwedinh xajaghindil. Nenduw h ?ananajenentat'insh ?eguh Gudinit's'il?in ts'en xenajegwalnig, hink'an niyax yeqox Jordan ts'egwedinh ?eyed tubi?agubinlagh. ⁷ John nenduw h gagubelhnih, "K'adex deni ?inlhanx sech'a gu?en jid bet's'enz nagwedint'i ?eyen xatayalh. Lha guyax ?ašjagh beqitl'ul ch'inades?ed chuh gwech'ih hestan hast'ih. ⁸ Sid ?eguh gan tubi?anexwes?insh gan xeded ?eguh nadughunt'i gweqa Gudinit's'il?in bet's'enz gunzun¹ nexwetl'axeta?alh," gubelhnih.

John Sizi tubi?ayinlagh hink'an Lejab Sizi Gudinit's'il?in ch'an naduyax qa?ayaghinlh?in.

⁹ John nenduw h gat'in ?egu Sizi nen Galilee qwentex Nazareth ts'egwedinh ?egwenz xaghinyah. John ?eyed Jordan yeqox tubi?ayinlagh. ¹⁰ Tu xanaghedalh su gughad yat'ax ?elhch'egwenindlad, ?egwenz Gudinit's'il?in bet's'enz gangu nulh lhek'el² lant'ih gudes xaghet'i, Sizi yenighet'i ts'egwenaghilh?in.

¹ 1:8 K'es Gudinit's'il?in ba bisunanized.

² 1:10 K'es nadelk'el.



Nulh Lhek'el.

¹¹ ?Eyed hink'an gudes jeni nenduw h gagwedinh, "Nin seyi gunchagh jid nunest'in. Nanisni hast'ih."
¹² Nenk'eyed danh Gudinit's'il?in bets'enz niyax tintex ?egun tuya qa?ayinlagh. ¹³ Diny ?elhch'ažnan dzin tintes šedah, nulh dzan h beg hex nalh?as, ?egu Lejab ts'edinh, Sizi, Gudinit's'il?in ch'an naduyax qa?ayaghinh?in. Ch'iz ts'egwediz in gwech'ez ližanš jeyaxaghintan.


¹⁴ John nendats'enilht'i ch'iz, Sizi nen Galilee nanjah, ?Eyed Gudinit's'il?in yanagwalnig.
¹⁵ Nenduw h gadinh, "Gudinit's'il?in nexwa?anadeni ?eguh nenk'etsel gats'in ?egweyenentažinh. ?anananentaht'anx gwech'an nadežehdil hink'an Gudinit's'il?in gwa?anadeni ?eyed gwet'ayenuhtan."

Sizi deni diny lhuy qa?ajedet'in ?eyen guqajaghini.

¹⁶ ?Eguh ch'iz Sizi, biny Galilee ts'egwedinh tabanx gheyalh. ?Egu ?elhcheliqi Simon belh Andrew guts'edinh ?eyen lhaghembinh tanajelhdilh ?eguh jid lhuy qa?ajedet'in gubinhłtsan. ¹⁷ Sizi gubeghen nininyah hink'an gagubelhnh, "Nenjan gu?en selhnaŵah?as. Gangu lhuy qa?ah't'in ch'ih sa deni qa?ah't'in nexusilh." ¹⁸ Nenk'eyed belh gulaghembinh deni ?eyun ts'en jaghetilax hink'an Sizi belh jaghetižnan.

¹⁹ Lha nizex jaghinal ?egu Zebedee beyiqi James belh John guts'edinh ?eyen ts'ibid ježqih gulaghembinh sa?anajelax gubinhłtsan. ²⁰ Gubeghen nininyah nenk'eyed danh ?eyen chuh, "Nenjan gu?en selhnaŵah?as," gubelhnh. Nenk'eyed belh ts'i bixajaghin?az hink'an Sizi belh jaghetižnan. Guta

Zebedee belh jeyenadat'in ?eyen ts'ibid jedilhts'ih jeyaxetižnan.



Deni belhdan lhuy qa ?ajedet'in.

Deni ?inlhanx nentsen ?anayeli.

²¹ Hink'an qwentex Capernaum ts'egwedinh ?eyed jagheninan. Jews guba nats'etejish gwadzin šelin, gugun xents'agult'i qungh yedanx chets'aghiždil ?eyed nendajagheninan hink'an Sizi ?igubedetilh'in.

²² ?Inlhes lha jid gwa xudughunlni guyah ?eguh gagusun jeyaghinlhtig, lha Deni ?ijegwedelh'anx yajaghinlhtig ?eladinil gwech'ez lha banits'ilil.

²³ Nenk'eguh danh deni ?inlhanx nendaniyah ?eyen nentsen ?anayeli hink'an ya?anadeni, ?eyi jenidetiztsig,

²⁴ "Sizi Nazareth gwet'in ninlin. Didah nexwets'en xuzint'in? Ch'elenexwetaghanghanlh tesanent'in? Sid ?eguh nas'in! Nin Gudinit's'il'in ba su ?ech'a ninzun ninlin hanint'ih," nih.

²⁵ Sizi nenduwg gadinh, "Lha tezinjiz chu bech'ananindash," hadinih. ²⁶ Nenk'eyed belh nentsen deni qwenjih naghinlht'i, deltež hink'an ?elhch'edenog ta?at'in, gughelanz ch'alzel yixaghinqiž.

²⁷ Gats'in lha gwanijilil gwech'ez nelhjudelqig, "Xugwelt'in hagwet'in? Nenden ?eyuwg hink'an lha

jid gwa xudughunlni guyah ?egun gagusun jid deni ?igwedelh?anx. Nentsen ?eyi chuh jeyiniljed jeyedata?anat'in." ²⁸ Gagulhghen nen Galilee gagulhchugh jits'egwedinlhyan.

Sizi deni lhan dada guch'adaxilhchud; belhdan nentsen guch'adanizud.

²⁹ Xents'agult'i qungh tinajaghindan ch'iz James belh John ?eyen Simon belh Andrew guqungh ?eyed gulh ts'enindil. ³⁰ Simon bets'eyan yilin ?eyen denidah, gunchagh jid baxaghinsil, taş şetin ?egu Sizi gwajeyelhgwalnig. ³¹ Sizi yeghen nininyah, yela hinlhchud hink'an ninayedinlhtin. Nenk'eyed belh se?anajagh. Nenk'egun guba nadetilhni. ³² ?Eguh xelhyiz sa guxi?an ch'iz deni jedenidah gats'in belh nentsen ?anagubeli ?eyen Sizi bets'en guts'enilah. ³³ ?Eyed qwentex deni gats'in Simon bequngh nendeten chejaghiždil. ³⁴ ?Egu jalan dada ?elhagh?eyuw h ta?adant'i junten ?eyi guch'adaxilhchud hink'an nentsen gats'i guch'adanizud. Nentsen Sizi jeya?in gwech'ez lha yajulhtig qa?agubilil.

Sizi nen Galilee gagulhchugh naşiyah.

³⁵ ?Eguh ?egwilhqan lha yelhqex danh Sizi nidinyah hink'an qwentex gwe?anwh tintuw h ?egun ninyah; ?eyed xents'agutilht'i. ³⁶ Simon hink'an tes gubit'in ?eyen jeyeqanentižtan. ³⁷ Najeyinlhtin hink'an gajeyelhnih, "Jalan ?eyen nenqajeneta!" ³⁸ Gan gagubelhnih, "Qwentex ?ets'en gwelex gwetuwh denilh yatastig gweqa ?egun naghudilh. Lha nenjan dzanh hilih gweqa nendin niyah has." ³⁹ ?Egu gugun nen Galilee ?egun xents'agult'i qungh gwelex gagulhan naježdil. ?Eyed denilh yalhtish hink'an nentsen deni ?ixadanizud.

Sizi deni ?inlhanx beneş xadatlax ?eyen sa?anayinlagh.

⁴⁰ Deni ?inlhanx beneş xadatlax jid dada xunten ?eyen niyah. ?Eyen Sizi yenadas natsilegwedilyah

nenduwh gadinh, "Gužint'in hink'ed saya?ananenjagh sa?anasughunlax." ⁴¹ Sizi yaye?ajagh, yets'en chidilhni yixedaghinax hink'an nenduwh gayelhnih, "Sa?anaghundanx guzest'in." ⁴² Gagulhghen dada yech'axilchud. Nenk'eguh danh se?anajagh. ⁴³ Sizi ?eyed gu?en gwetl'ayelhtish nayene?en jid gayelhnih, ⁴⁴ "Lha deni ?inlhanx galhežinih. Gan yašalhtig bixedenughunl?in. Yedanx danh Moses ts'edaghini nexwanigughenilah ?eguh gaghunax. ?Eguh ch'iz deni gats'in gubixedenaghinl?in ?eguh jid sa?ananenjagh ?egwets'eyenužin." ⁴⁵ ?Eyed lha gudilhanl gan nenduwh gheyalh ?eguh deni gats'in belh nagwalnig, gwech'ez Sizi lha jid gutuwah naŵeya guyah yelhtsin. Lha nats'ešdilh ?eguh denilin. ?Eguh chuh ?elhts'enz xadats'edilh bets'en ts'enindil.

2

Sizi deni ?inlhanx lha jid beneš naxulhnangh guyah ?eyen se?anayinlagh.

¹ Lha ?agulhah dzin ghili Sizi qwentex Capernaum bequngh nanjah bits'egwedilhyan. ² ?Eyed deni lhan jeyets'enindil, qungh jiz belh ts'egwedižben. Nendeten chuh ?elhqats'edenindil, gu?anwh chuh deni ganlhan. ?Eguh chuh Gudinits'il?in bejeni gwa gubelh yaghinlhtig. ³ ?Egu deni diny, deni ?inlhanx lha jid beneš naxulhnangh guyah ?eyen jeyets'en jeyalhtilh.

⁴ Hink'an lha jid nendajeyewelhtilh guyal. Gwechugh deni lhan nendeten nendajedenindil gwech'ez gudish bench'ed teježdil ?eyed bench'ed xajegwedaghinlah ?egun guyen lha jid beneš naxulhnangh guyah ?eyen betaš belh guyax Sizi yenadas gwet'ajeyaghinlhal. ⁵ Sizi xugunlhched jid jeyudidlan ?eguyenižin. ?Egu deni lha jid beneš naxulhnangh guyah ?eyen gayelhnih, "?Etinel?in tsinsh ?anananentaghint'ish nanats'egughetiž?an."

⁶ Nenk'eyed belh
Deni ?ijegwedelh?anx
belhdan gweghex
jedilhts'ih ?eyen
nenduwh
gajeyenižen:

⁷ "Nenden xugunht'i
gweqa Gudinits'il?in
yech'an yalhtig³
hadinh? Lha
?inlhanx

?ananats'enentišt'in
deni ghanagughetu?ash guyah. Gudinits'il?in
nenk'eyen dzanh gat'insh hagunt'ih."

⁸ Nenk'eguh danh Sizi xujeyenelžen ?eguh
guch'inighized gwech'ez nenduwh gagubelhnih,
"Xugunht'i gweqa nenduwh gayenehžen haht'ih?"

⁹ Nenden bets'en nenduwh gagwel?iny jid
galhetasnilh, ?anananentaghint'insh
nanagughetas?alh, k'es, Nidinyash, nentaš

nachexinlnish k'an ghinyalh
lhetasnilh tesanh? ¹⁰ Nenjan
nench'ed Deni gudes xaghinyah
?eyen ?ananats'enentat'insh deni
ghanagughete?ash gwe?anadeni
?egweyenuhsin..." gubelhnih.
Guyen deni beneš lha jid
naxulhnagh guyah ?eyen gayelhnih,
¹¹ "Nidinyash! Nentaš
nachexinlnish k'an qungh
natughunja!"

¹² Nenk'eguh danh nidinyah.
Gwanini betaš nachexinlnih, deni
nalh tinanjah gwech'ez deni gats'in
lha gwanijilil. Gudinits'il?in



Deni lha jid beneš naxulhnagh guyah.



*Betaš nachexilhni
gwanini tinanjah.*

³ 2:7 3:28—29 belh 14:64 chuh gweninlh?in.

jeyedilhti jid nenduw h gajedin h, "Lha ?inlhed gagunt'ih gwenil?in haghit'i!"

¹³ Sizi tinanjah hink'an shunchuw h gugun biny tabanx ?egun nanjah. ?Eyed deni lhan jeyets'enindil. Nenk'eyed dan h ?igubedetil h?in. ¹⁴ ?Eguh gheyal h ?egu Alphaeus beyi Levi ts'edin h ?eyen seneya taks chets'aghenedzish qungh seneya chexenedzash gweqa ?eyed sedah yinlhtsan belh gayelhnih, "Selhtughunya!" Nenk'eyed dan h nidinyah yelhtizah.

Sizi ?ananajenentat'insh ?eyen dzan h guqajenish.

¹⁵ Sizi belh jeyelhnadilh, Levi bequngh ?eyed nejedan. Deni lha?al hah jeyenadel h belhdan seneya chejaghenedzish gwa?anajedeni, ?eyen belh gwaghex jid jadel h ?eyen chuh denilh nejedan. ¹⁶ Pharisee jilin Deni ?ijegwedelh?anx ?eyen Sizi deni gadajint'en belhne?edan jeyinlhtsan, ?eyed gweqa Sizi jeyelhnadilh ?eyen guts'udilhqed, "Dideqa deni gadajint'en gul h ne?edan han?"

¹⁷ Sizi gubedezt's'an hink'an nenduw h gagubelhnih, "Deni lha dada jilih ?eyen lha daxdah jutašt'in hajint'ih gan deni jedenidah dzan h daxdah jutat'in hajint'ih. Lha guyen deni ts'idaneš jadel h jaghedi jeyenedžen qajezesnish, gan ?ananajenentat'insh ?eyen guqajesnish has."

Sizi jeyelhnadilh ?eyen xugulhyad lha ?ejetašinh ?eguh gagubelhnih?

¹⁸ Deni belhdan Sizi jeyets'enindil hink'an nenduw h gajedin h jeyudilhqed, "John jeyelhnašedil ?eyen belh Pharisee jeyelhnadilh ?eyen xenchuh lha did chuh ješan⁴ jegughilh?an, Xulht'i jid nin nelh najedilh ?eyen lha gaješt'in?"

¹⁹ Sizi gagubelhnih, "Deni ?inlhanx ts'iqi belh tubi?atanilh gweqa jeyets'enindil, ?eyen gutuw h xayah dan h xulht'i jid lha did chuh jetašinh? Gutuw h

⁴ 2:18 K'es jetalhnex.

xayah danh jetanax hajint'ih.⁵ ²⁰ ?Inlhetah dzin guyen deni tubi?atanilh ?eyen gubanatadalh, ?eguh ch'iz hink'an lha did chuh jetašinlh hajint'ih. ²¹ Lha ?inlhanx, ?inats'elhqig k'an ?eyi, lha nats'etelhtsad chu ts'enzjed ch'ed jinats'ebedenentalhqalh. Gats'ejagh hink'ed ?inats'elhqig k'an ?eyi natilhtsad, ts'enzjed gu?en jid tadlelh. ²² Lha ?inlhanx ?ežežjed, tu nentsen bits'enilh helin gant'i ?eyi, lha jid tu nentsen k'an binats'unilh guyah hagunt'i. ?Eyed gats'ejagh hink'ed ?elhch'enentadlelh han, ?eguh ?anilht'id tatsanx. Tu nentsen k'an, ?ežež k'an bits'eghinel ?eguh sink'an se?agweta'ilh."⁶


Nats'etejish gwadzin nendideqa gats'egunlagh?

²³ Jews guba nats'etejish gwadzin šelin, Sizi belh jeyelhnadilh ?eyen tl'ech'ed gwets'enaghindzay gwedenilhyan ?eguh gwek'abah jeghanalh. Jeyelhnadilh ?eyen tl'ugh betelhangh gwadenenindzay ?eyi jeyenez sajeyelgwish jeghanalh. ²⁴ ?Egu Pharisee gulhts'edinh ?eyen Sizi gajeyelhnih, "Dideqa guyen nats'etejish gwadzin lha gajetašt'inlh jid gwets'enz gulih ?eguh gajet'in?"

²⁵ Gagubelhnih, "Yedanx danh David ts'edaghini belh jalan jeyixudinten ?eyen gwetuwh jegušt'in hink'an guchanyagužun, xujelhyad ?eguh lha gwech'eyašelhtig teladehni?" ²⁶ Abiathar ts'edaghini Jews guba yašalhtig ?aghendes helin ?egwedanh, David Gudinit's'il'in bats'elhben ?egun nendaniyah, lhiz, Jews guba yašalhtig dzanh jeyeyinsh jigwets'enz ?eyi yaghiyan hink'an ?eyi belhdan jalan yixudinten ?eyen chuh gutexayežni."

⁵ 2:19 Sizi lha sex gutex denitašlilh nenk'ed tsel gubanatadalh gweqa hagubelhdaghini.

⁶ 2:22 Sizi nenduw h gagubelhnih hadaghini, "Lha gugun Gudinit's'il'in guzun jid nexwadaniwežed gweqa ?aghatsel lha ?ežehyan xedanigwežeh ?ash chu nenjan nasah danh nexwetuw h nasah gweduwelhti."



Gudinits'il'in bats'elhen jiz nenduw h gaguhint'i.

²⁷ Gughelanz gagubelhni, "Nats'etejish gwadzin ?eguh deni gha gats'egunlagh hagunt'ih. Deni ?eyen lha nats'etejish gwadzin gwa?aguts'ilil. ²⁸ Deni gudes xaghinyah nesdlin ?eyen dzhanh nats'etejish gwadzin ?eyed chuh gwa?anadeni hant'ih ?egweyenušin."

3

Nats'etejish gwadzin Sizi deni sa?analagh.

¹ Sizi shunchuw h Jews guba xents'agult'i qungh nendaniyah. ?Eyed deni bela ch'es lha jid naxulhnagh guyah ?eyen chuh ?eyed nayah. ² Jews guba nats'etejish gwadzin deni sa?anawelax gweqa deni belhdan sutsel Sizi jeyaxiztan. Gajagh hink'ed nats'etejish gwadzin ?anat'in jeyagulnig jeyenižen. ³ Sizi guyen deni bela ch'es lha jid naxulhnagh guyah ?eyen nenduw h gayelhni, "Nidinyash k'an deni gats'in nadas⁷ nininyash."

⁴ Nenduw h gagubelhni, "Nats'etejish gwadzin nenduw h telah ts'idaneš⁸, guzun k'es guntsen

⁷ 3:3 K'es bed.

⁸ 3:4 K'es se?agunt'ih.

taʔanatsʼetatʼin, deni tsʼetalhyish kʼes chʼatsʼedetalilh?ʔ”
Lha jeyetsʼenztijish.

⁵ Sizi xenilchʼagh jid gutuw h yetaghinʔin. Gutsi denaghintsʼi gwaneš guba bedzi denišdag h. Guyen deni bela chʼes lha jid naxulhnagh guyah ʔeyen nenduw h gayelhnih, “Chidežinlnish!” Chidilhni danh⁹ bela saʔanajagh. ⁶ ʔEguh chʼiz Pharisee ʔeyen tinajaghindan. Herod gubixudinten ʔeyen belh ʔelhijaghindil¹⁰ hinkʼan Sizi chʼajyedulax gweqa jegughetižʔan.



*Pharisee belh Herod
gubixudinten lha jegutʼin.*

Deni lhan Sizi jeyechʼih tiždil.

⁷ Sizi belh jeyelhnadilh biny gwetsʼen najendil. Hinkʼan deni lhan nen Galilee xadaježdil ʔeyen chuh jeyechʼih tiždil.

⁸ Xugheltʼin ʔeguh bitsʼegwedilhyan gwechʼez

nen Judea hinkʼan qwentex Jerusalem, nen Idumea, nen yeqox Jordan gunez, qwentex Tyre belh Sidon tsʼegwedinh gweghex, ʔegwenz deni lhan xadašedil.
⁹ Gwechugh deni lhan jeyetsʼenindil gwechʼez jeyelhnadilh ʔeyen gagubelhnih, Deni lhan sixuwedilh chʼa tsʼi saxendušin. (Gughagužlid ʔeguh su gajejagh.)
¹⁰ Guyen jedenidah ʔeyen deni lhan dada guchʼadaxilhchud jeyigwedilhyan gwechʼez gwechugh jeyixutiždil hinkʼan jeyixeduwenax qaʔajetʼin.

¹¹ Deni belhdan nentsen ʔanagubeli ʔinlhanx-liny Sizi jeyulhtsʼig belh jeyiniljed gwechʼez jeyenadas guyax jedigwen tajaghetelzig¹¹. Nenkʼeyed belh nenduw h gajedinh jenijeditsig, “Nin Gudinitsʼilʔin

⁹ 3:5 Kʼes belh.

¹⁰ 3:6 Kʼes gutsʼen jenindil.

¹¹ 3:11 Kʼes tajagheteltʼish.

beyi ninlin hanint'ih." ¹² ?Eyed gwech'ez gagubelhni, "Inlhes lha nendan hast'ih gadezehni."

Sizi deni ?elhch'ažnan gu?en nandih denitex xagubaghinlah.

¹³⁻¹⁵ ?Eguh ch'iz Sizi niyax dilhgwenlh tuwh gwets'en niyah hink'an nendan gubust'in ?eyen denitex xagubaghinlah, ?eyen jeyets'enindil, ?elhch'ažnan gu?en nandinh jelt'ih. ?Eyen jeyelndenitalih, ch'iz Gudinit's'il'in bedanajegwetalnig gweqa nen gagulhchugh gwetl'agubetalih; hink'an nentsen deni ?ixadajeniyud guts'enz ts'egwetalsilh.

¹⁶⁻¹⁹ ?Elhch'ažnan gu?en nandinh jelt'ih ?etex xagubaghinlah ?eyen nenduwh gaguts'edin: Simon ?eyen Peter jid nayusdzin. Zebedee beyiqi James belh John, ?eyen "?Indiny Beyiqi" jid nagebusdzin. Andrew, Philip, Bartholomew, Matthew, Thomas, Alphaeus beyi James, Thaddaeus, Simon ?eyen Zealot gulhts'edin gubixudaghinten. Judas Iscariot ?eyen gwech'iz Sizi yech'an ninadinjah.

Deni ?ijegwedelh?anx Sizi yech'an ?ajedin gweqa Sizi gulh yaghinlhtig.

²⁰ ?Eguh ch'iz Sizi qungh ?ananjah. ?Eyed shunchuwh deni lhan jeyandanindil gwech'ez jeyelhnadilh ?eyen gulh lha jid nejudan guyal. ²¹ Sizi belhtesiqi kult'in ?eguh jeyigwedinhyan. "Lha gunih hat'in," jedinh jeyeqanatisdil. ²² Deni ?ijegwedelh?anx qwentex Jerusalem xajeghindil ?eyen gajedin, "Nenguyen nentsen Lejab ?anayeli hink'an ya?anadeni. Yeghad ?anat'in, nentsen gha?anadeni chuh ?ant'ih ?eyi beghad nentsen deni ch'adaneyud han."

²³ ?Eyed gweqa Sizi guqajaghini hink'an gwech'inijužid jid gulh nagwetilhnig, "Xulht'i jid nentsen Lejab xeded tixedenuwejud? ²⁴ Nen ?inlhed ?elhelh jedilhts'ish ?eyen ?elhch'an ?ajedin jehlin hink'ed xulht'i guzun jid denijetalih hajint'ih?

²⁵ Qungh ?inlhed ?elhelh ts'edilhts'ish ?eyen
 ?elhjedelnax hink'ed xulht'i guzun jid ?elhelh
 jedetalt'silh hajint'ih? ²⁶ ?Eyed gangu Lejab xeda?ets'en
 ?anadedinsh gagunt'ih xungh. ²⁷ Nenduwch huh
 gagunt'ih xungh, Xulht'i jid deni nadint'i ?eyen
 bequngh nendats'enintsed hink'an bets'enz tits'etalilh?
 Deni nadint'i ?eyen ts'elghil sink'an gats'unax. ²⁸ Sid
 ?inlhes ts'idaneš jid ganexwelhdetasnilh,
 ?ananats'enentat'insh gats'i belh Gudinit's'il'in ts'en
 guntsen ?ats'edin¹² ?eyi deni ghanats'egugheta?alh.
²⁹ Gan nendan Gudinit's'il'in bets'enz gunzun
 xagwedaghi?ah ?eyi bets'en ?aghelangh gwedetsen jid
 jeyech'an ?ajedin¹³ hink'ed lha jid
 gubanats'egughetu?alh guyah hajint'ih; gan ?eyi
 gagulhnaž gubelh gata'ilh hagunt'ih."
³⁰ "Nentsen ts'enz bid ?anat'in," jedinh gwech'ez
 hagubelhdaghini.

Nendan hanh, Sizi belhtesiqi hajint'ih?

³¹ ?Egu Sizi be?inkwel belh becheliqi jenindil. ?Eyed
 ya?anxw najedilhyah, Sizi naxuzit'in jedinh bets'en
 jeni gwetl'ajaghi?an. ³² Deni lhan jeyeghex
 najedilhts'ih ?eyen gajeyelhnih, "Ne?inkwel belh
 nencheliqi gu?anwh najedilhyah, nenjušt'in."

³³ Sizi gagubelhnih, "Nendan hanh se?inkwel belh
 secheliqi hajint'ih ganexwelhusni."

³⁴ Hink'an jeyeghex najedilhts'ih ?eyen gutuwch
 ni?iz hink'an nenduwch gadinh, "Nenduwch hinla
 se?inkwel belh secheliqi gajint'ih. ³⁵ Nendan
 Gudinit's'il'in yedata?anat'in ?eyen sechel belh sediz
 belh se?inkwel hajint'ih."

¹² 3:28 2:7 belh 3:29 belh 14:64 huh gweninh?in.

¹³ 3:29 2:7 belh 3:28 belh 14:64 huh gweninh?in.

4

Sizi nagweding bech'initš'ežig gant'i bid denilh nagwelniġ.

¹ Sizi shunchuwġ ?inlhed biny tabanx deni lhan ?igubedetilġin. ?Inlhes gwechugh deni lhan ba nanalžul gwech'ez ts'i bitl'adadah, nilhdil nišeqin, deni gats'in ?eyen biny tabanx nitr'ajedilts'ih.

² Lha?agulhah jigubedelġanx ?eyi nagweding bech'initš'ežig gant'i bid gulh nagwetilġniġ.

³ "Užuwelhtš'an! Deni ?inlhanx gwenentadzish gweqa tl'ech'eyah. ⁴ ?Eguh yenentaghindzish belhdan ?eten nanaghinguy, ?eyi nulh xaghindil ts'elejegwelhdil. ⁵ Belhdan gweltsi lha gwechugh lhiz gulih ?eguh nanaghinguy gwech'ez gagulġghen xanaghilġhan. ⁶ ?Eyi hink'an lha beghed dines gwech'ez sa bid ch'ele?ezts'el, ?elhenaghelġen.

⁷ Belhdan xwes tuwġ nanaghinguy, ?eyi gan xwes nen yaxagwent'an, bechen gwežlin gan lha belangġ tenigwish. ⁸ Hink'an belhdan nen nezun ch'ed nanaghinguy. Bechen xanaghilġhan, ?eyi bets'enz tad ?elhch'ažnan (30), belhdan ?elhch'antay ?elhch'ažnan (60), hink'an belhdan ?inlhed hunded (100) galhan ba tenižguy."

⁹ Hink'an Sizi gadinh, "Nendan ?edežts'an ?eyen gwech'ighaniwešed."

Sizi nagweding bech'initš'ežig gant'i su xugweldinh ?eguh jighanagubenilġtan.

¹⁰ Xeded belh guyen ?elhch'ažnan gu?en nandinh jelt'ih belh guyen bech'ih najenelžulh belhdan ?eyen gubanats'adil. Ch'iz nagweding bech'initš'ežig gant'i bid nagwalniġ ?eyi gwa jeyudilhqed. ¹¹ ?Eguh hink'an gagubelġnih, "Gudinits'il?in xulġt'i jid su ?egun denits'uli gušt'in ?eguh deni ghagwe?inz gwež?an gwelagunt'ih, ?eyi gangu nexwats'id nagughitsid

gasjagh. Gan nexwagu?anxw deni ?eyen nagwedding bech'initš'ežig gant'i dzanh bid gulh nagwasnig.

¹² ?Eyen gagulhnaž jegwenilh?in gan lha xugunlht'ih ?egwejeyenešanx, ?elhch'iz ?ejužilhtš'an gan lha ?egwejeyenešanx; gan jegughintan hink'ed, Gudinitš'il?in ts'en najedizah chu?ajejagh hink'ed gubets'en ts'idaneš nats'egwetalhtsilh."

¹³ Sizi gubets'en gadinh, "Nendid nagwedding ?eyi lha ?egweyenežešanx hink'ed xulht'i jid nagwedding bech'initš'ežig gant'i gats'i ?egweyentašinlh haht'ih?
¹⁴ Gudinitš'il?in bejeni denitš'en ?its'egughelhnih ?eyed gangu deni nen gwenedzash gagunt'ih xungh. ¹⁵ Deni belhdan ?eten gwech'ih nen gajint'ih. Gudinitš'il?in bejeni gubitš'egughilhni gan nenk'eyed belh Lejab, Gudinitš'il?in bejeni gubech'axelchog. ¹⁶ Deni belhdan nen gweltš'i lha gwechugh lhiz gulih gajint'ih. Gudinitš'il?in bejeni jedežtš'an, nenk'eyed belh gwajenini; ¹⁷ ?Eyen lha gubeghed dineš jid gubadanigwedžed, ?eyen lha sex ?ejegulil. Gudinitš'il?in bejeni jegudidlan gwech'ez gubayats'elhtig hink'an gubants'etedlux, ?eyed gwech'ez gagulhghen gwech'ajeltš'ig. ¹⁸ Belhdan ?eyen xweschen tuwh nen gajint'ih. Gudinitš'il?in bejeni jeditš'insh, ¹⁹ denijuli qa?ajeťin gan lha su ?egun ?agwašt'inlh, seneya jilyuž ?eguh gagulhnaž jenentani jaghedijeyenedžen, hink'an gwetuwh jegulyuž dzanh qa?ajeťin, gajint'ih gwech'ez lha gagulhtsel jid Gudinitš'il?in bejeni ghadaniješed yajilin. ²⁰ Belhdan ?eyen nen nezun gajint'ih. Gudinitš'il?in bejeni južaghilhtš'an, ?eyed gwet'ajeyenintan, gwet'ad guts'enz guzun gwetalax, gangu tl'ugh belangh lhan tenižguy ?eguh jid gubadanigwetadžed, belhdan ?eyen gangu tad ?elhch'ažnan (30), ?elhch'antay ?elhch'ažnan (60) hink'an belhdan ?inlhed hunded (100) tesanh galhan jid gubets'enz guzun gwetalax."

Gudinits'il'in bejeni jeduwelhti gweqa ?igubedelh?anx.

²¹ Nenduwch chuh gagubelhni, "Guyi tlagh dižk'en beqwen ?eyi chuh Gudinits'il'in bejeni gant'ih, nats'edilhk'an qungh nendats'eninčan, gwetuwh bits'edenentalhgwish tesianh k'es ch'edeštin yes nits'etaqalh, xulht'i taxeqash gwa?agunt'i ?eyed tets'uqalh. ²² Nendid ts'enentinh?iny ?eyi ts'ulhtsax gweqa hat'ish. Hink'an nendid gwe?inz helin ?eyi ts'id ts'ulhtsilh gweqa hat'ish.¹⁴ ²³ Nendan ?edežts'an ?eyen gwech'ighaniwešed."

²⁴ "Nenduwch gwedežehts'an sutsel gwadaniwešed. Gagulhtsel jid šužilhts'an nenk'eguh gagulhtsel jid gwech'ih ta?anant'in nenk'eguh gagulhtsel jid nelh?agwetanilh. Gu?en jid šužilhts'an gwech'ih ta?anant'in, gu?en jid nelh ?agwetanilh.

²⁵ Nendan gwetuwh gut'in ?eyi yid ?anat'in hink'ed gu?en jid lhan betl'ats'etalilh. Nendan yit'in lha yid ?anašt'in hink'ed nendid yit'in ?eyi yinadetadinh."

Xulht'i jid Gudinits'il'in bejeni ?igubedaghilh?in?

²⁶ Hink'an nenduwch gadinh, "Deni ?inlhanx benen gwech'ed ?enentaghindzish gagunt'ih hagunt'i gugun Gudinits'il'in gwa?anadeni ?egun. ²⁷ Guyenaghindzay ?eyi ?elh?i netish hink'an ?abenaneš nidiyash gughad xadadenelh?as gwech'adadenelhyi, ?eyed xulht'i gagwet'in chuh lha ?egweyenižen. ²⁸ Xedint'ah nen gha xanelhyish, bechen šid hink'an belangh tenegwish ?eyi bigwediltšish, ?egun ch'iniyish. ²⁹ ?Eguh hink'an ts'edetat'eš gwanagughized, šay ghetinh tl'ech'eyash ?eyi bid nagwedet'ish."

³⁰ Nenduwch chuh gagubelhni, "Gudinits'il'in gwa?anadeni xugunlht'ih ?eguh; xugulht'i jid ganexwelhdetasnilh, k'es nagweding bech'initš'ežig gant'i xulht'i bid su nexwelh gwetasnig? ³¹ Mešded

¹⁴ 4:22 Sizi Gudinits'il'in bejeni ghayalhtig hadaghini.

guts'enedzish gagunt'ih xungh; ?eyi hah su ?ech'a
nintsel guts'enedzish hagunt'ih; ³² ?eyi
guts'enaghindzay hink'an ch'idenenilhyan hink'ed,
nižt'an yaz ?eyuw h ghedex gats'i ch'a dinaž helish.
Began chen det'ux helish, ?eyi bežaƧod gha nulh yetex
xedeldilh."

³³ Lha jid gu?en jid gubini ?igwedutl'id guyah
gwets'en nagweding bech'inits'ežig gadant'i
?elhidalt'ih hilin bid gulh nagwalnig; ³⁴ nagweding
bech'inits'ežig gant'i dzan h bid gubelh nagwel nig, gan
guyen jeyelhnadilh ?eyen jadint'ah sul
jighanagubeneltinsh.

Sizi nilhts'i naxedaghinlht'i.

³⁵ ?Eguh dzin xelhyiz Sizi jeyelhnadilh guts'en
gadin h, "Gunan neghagh uqi." ³⁶ Deni lhan tabanx
najedilhyah nenk'egun gajint'ih; ts'ibid šedah
nenk'egun gant'ih jeyajighindil, gwech'a jenin qin.
Deni ?eyun belhdan ts'i ?eyuy bid guch'ih gwech'a
daježqin. ³⁷ Taniz hilin najaghinqin ?egu xentsel
gunchagh jid gulh taghints'ish, tadetinsh gwech'ez
gubets'i bitaneqed, gulh ts'i detižben gwech'ez
najaghenentišdil. ³⁸ Sizi ?eyen guniz tsi?alh ch'ed
tenilh?an belhežilhghin. Ch'inajeyeneneyud hink'an
gajeyelhni h, "Sizi, ch'eležig gan ?eguh chuh nents'en
lha ?elhagh?eyuw h hilih telanint'ih?"

³⁹ Gubeda nidinyah belh nilhts'i ?eyi gwechugh jelh
yaghinlhtig hink'an tadetinsh ts'en gadin h, "Lha
tezinjiz! Naxedilt'ax!" Nenk'eyed belh nilhts'i
naxedalt'i hink'an taqay nagwediggil!

⁴⁰ ?Eguh hink'an guts'en gadin h, "Dideqa neželhjud
hant'ih? Shunk'ah lha Gudinits'il?in bet'ayenehtan
gwech'ez telaneht'ih?"

⁴¹ ?Inlhes jenilhjud hink'an nenduw h gajedin h
nelhjudelqed, "Nenden deni xunlht'en hant'ih?
Nilhts'i belh tadetinsh ?eyi hinchuh yedata?anat'in!"

5

Sizi deni ?eyen nentsen lhan ?eyi yixadanizud.

¹ ?Eyed biny gunan Gadarene nenz gwets'en naghajeninquin. ² ?Eyed deni ?inlhanx nentsen ?anayeli ?eyen ts'iny gwets'enz xaghinyah, gugun neghats'enindil ?egun gwech'aniyah. ³ Nenden deni ts'iny denilin, hink'an lha ts'elghil ?egun gawet'i gulih. Chain chuh lha jid yuweten guyah. ⁴ Gwelan bela chain bid ts'elghilh hink'an satsan batish chain jidzanint'i beqichench'ih jits'edilish. ?Eguh chuh chain ?elhtexaginsh hink'an satsan ?elhtexalhqig. Lha ?inlhanx ?inlhes yetalhcholh gwasanadilt'i. ⁵ Dzindi hink'an tez dilhgwenlh tuwh hink'an ts'iny tuwh ?egun xazilh hink'an tsi dinin bid benes ch'adagweggans.

⁶ ?Eyen nizaž danh Sizi yulhts'id belh yets'en ?inlhes nilgay nenk'egun yenadas betsigwed binaghetled.

⁷⁻⁸ Sizi gayelhnih, "Nentsen ninlin nenden deni bech'ananindash."



Deni nentsen ?anayeli gubets'en ghelgish.

⁷Eyed gwech'ez Sizi yets'en nenduw h gadin h jenidaghintsig, "Didah sets'en xuzint'in? Sizi, Gudinit's'il'in su ?ech'a yadi helin ?eyen beyi ninlin hanint'ih. Nenta ts'en lha jinašenežughulhtanx dughuni."

⁹Eguh hink'an Sizi yudilhqed, "Xunelhts'edinh hany?"

Nenduw h gadin h, "Nidlan gwech'ez Legion selhts'edinh hast'ih." ¹⁰?Elhch'iz Sizi yets'en ?etidedlih jid nenduw h gadin h, "Lha ?ets'en nexwentežiyud."

¹¹Lha gwech'a dižad ?eyed gwenen gesugh lhan nagwedeldilh. ¹²Guyen nentsen, "Gesugh nighudilh gweqa gesugh tuwh nexwidilghalh," jedinh Sizi bet's'en ?etijededlih.

¹³?Eguh gajunax qa?agubinlagh, nentsen deni ?ixajaghindil hink'an gesugh ?inlhed tawzen nad ganilt'ish galhan ?idanaješdil. Nenk'eyed belh biny gwets'en gwedlen gwenixeninan ?egun tis xeninan, nenk'egun tu gubaghighan.

¹⁴Guyen gesugh ghajaghižtan ?eyen gwatsijaghetilhnan hink'an qwentuw h belh nen gweghex ts'edilhts'ish ?eguh nenduw h xugulhyad ?eguh gwanajegwalnig. Hink'an jiejegwedilhyan ?eyen jegwenuwelh'in jeyenižen gweqa ?egun jenindil.

¹⁵Sizi jeyanaghindil, guyen deni nentsen Legion ?anaježlin ?eyen ts'enz ?išedah hink'an lha bini xulht'ih chu šedah jeyinlhtšan, jeyinilhjud. ¹⁶Guyen xugwalt'in jegwenaghinh'in ?eyen guyen deni nentsen ?anaježlin ?eyen xuts'ilhad gwanajegwalnig; xulht'i gesugh taxaghinan ?eyed chuh gwanajegwalnig.

¹⁷?Eyed gwech'ez deni chejaghiždil ?eyen gajedin h, "Sizi, nexwedu?aghunax, nexwenen jixanaghunja."

¹⁸Sizi ts'ibi natisdzah ?egu guyen nentsen ?anaježlin ?eyen "Nexwelh tus'as," yelhdetižni.

¹⁹Sizi lha yech'a gut'in gan gayelhnih, "Nenqungh nendaqi ts'en natuwunjah, ?eyen xugulhched jid Sizi

nelh[?]ajagh, [?]inlhes gunchagh jid nenchanats'elyagh gwanagughulnig." ²⁰ [?]Egu nen Decapolis ts'egwedinh ts'edilhts'ish lha[?]agulha gwetuwh denilh xulht'i jid Sizi yelh[?]ajagh [?]eguh gwanagwelnig helgay, deni gats'in lha gwanijilil.

[?]Inlhed dzin Sizi ts'iqi nandih sa[?]anagubinlagh.

²¹ Sizi [?]eyed biny ch'ih neghanajenqin, [?]eyed tabanx deni lhan beghex chejaghi[?]zdil. ²² Deni [?]inlhanx xents'agult'i qungh gwa[?]anadeni Jairus ts'edinh [?]eyen chuh [?]eyed niyah. Sizi yinlhtsan belh yenadas guyax digwen taxedetilhts'ed, ²³ hink'an [?]atidedlih jid gadinh, "Seyats'i nenk'etsel ch'adanilh. Selhnaghint'es, sa[?]anaghunlax, deniweli gweqa bech'idughunlnish."
²⁴ Nenk'eyed belh Sizi yelhnatist'az.

Deni lhan belh nentilh[?]zul, jeyixunax ta[?]ajet'in jeghanalh. ²⁵ [?]Egu ts'iqi denituwh ghelgish [?]inlhanx [?]eyen [?]elhch'a[?]znan gu[?]en nad xi gagused ts'iqi nadzedlish gagunt'ih jid gwechugh del lhan be[?]at'in jid dada helin. ²⁶ Gunchagh jid gwadenildah. Seneya yit'in gats'i nilhnan gwets'en daxdah lhan tuwh niyah, [?]eguh chuh lha sa[?]anadinl gan gu[?]en jid gwechugh [?]ajagh. ²⁷⁻²⁸ Sizi yigwedilhyan belh gan bets'enz [?]ixedaghinax hink'ed sa[?]anatinlh yenizen gwech'ez deni lhan tuwh yet'ay nilgay, yets'enz [?]ixedaghinax.
²⁹ Nenk'eguh danh del ba[?]at'in nagughedalt'i hink'an lha gwadenildah jid xedinadisindh.

³⁰ Nenk'eguh danh Sizi, bid deni se[?]anah[?]insh belhdan bech'adenized [?]egweyeni[?]zin. Deni lhan bech'ih ghedelh guts'en nadizah hink'an gebudetilhqed, "Nendan sets'enz [?]ixedaghinax?"

³¹ Jeyelhnadilh [?]eyen gajeyelhnih, "Deni ganlhan nixudilh [?]egweyeni[?]zen [?]eguh chuh, 'Nendan sixedaghinax?' dinih [?]udinlhqed."

³² [?]Eguh chuh Sizi nendan hajagh sul [?]egweyenu[?]zin qa[?]at'in. ³³ Ts'iqi xeded xulhyad [?]eguh [?]egweyeni[?]zen

gwech'ez yeghen nininyah nenk'egun yenadas guyax digwen taxeditilhts'ed, nilhjud gwech'ez dilhteš. Dideqa yixedaghinax ?eguh gagulhchugh ?alh?adinj jid yelh nagwalnig. ³⁴ Sizi ts'iqi gayelhnih, "Set'ayenintan gwech'ez se?ananenjagh, lha gwech'iz banadenentezaghandalh, nendzi nezun gwanini denighunli."

³⁵ Sizi shunk'ah yalhtig gan deni belhdan Jairus ts'edinh xents'agult'i qungh gwa?anadeni ?eyen bequngh xats'aghindil. Gajedinh, "Nenyats'i yedanx ch'adejagh. Deni ?igwedelh?anx ?eyen lha gu?en jid banisizid." ³⁶ Sizi gajedinh ?eguh lha xagubilh?al.




Jairus bequngh gwanajagheghinan.

Gan guyen xents'agult'i qungh gwa?anadeni ?eyen gayelhnih, "Lha xagubinh?ah, gan set'ayenintan." ³⁷ Sizi lha deni ?eyun belh tudilh ?anil. Peter hink'an ?elhcheliqi James belh John ?eyen dzanh gubelh jaghetunalh gušt'in. ³⁸ Guyen xents'agult'i qungh gwa?anadeni ?eyen bequngh tats'edišdinh

gwanajaghindil. Ts'etsagh hink'an ts'ezel jid ts'etsagh ta'ats'edinh. ³⁹ Nendaniyah hink'an guts'en gadinh, "Dideqa ts'adenelhdil? Guyen ?esqi lha ch'adinil gan belhezilhghin han."

⁴⁰ Gan jeyitidiž'in jid jeyantadluy. Gats'in tigubeneniyud ch'iz, guyen ?esqi ts'iqi beta belh beban belh guyen gubelhnindil ?eyen, ?esqi nents'in hant'ih ?egun nendajenindil. ⁴¹ ?Esqi la hinlhchud hink'an yets'en gadinh, "Talisah kum!" (Aramaic ch'ih nenduwh gadinh hadaghini, "?Esqi ts'iqi ganelhesnih, Nidinyash!") ⁴² Nenk'eyed danh nidinyah hink'an ?eguh natilghay. ?Elhch'ažnan gu?en nad xi ghinda haghint'i. Nenduwh gagujagh gwa ?inlhes gunchagh jid lha gwanijilil. ⁴³ Nenduwh gagubelhnih, "Nenduwh gagujagh ?eguh gwa ?inlhes lha deni ?inlhanx gubelh gweželhngig."

Nenduwh chuh gagubelhnih, "Ts'eyan ?inlhitah betl'axulhnish."



Nen Galilee ts'egwedinh ?eyed Sizi nizan.

6

Sizi Nazareth niyah ?eyed bedešniqi lha jeyudidlanl.

¹ Sizi belh jeyelhnadilh ?eyed gwech'anajendil ?egun gugun qwentex nizan ?eyed najendil.

² Nats'etejish gwadzin selin, xents'agult'i qungh jiz deni ?igwedetilh?in, hink'an deni lhan xuldinh ?eguh lha gwanijilil.

Gwech'ez ga?elhelhjededinh, "Nents'enz xagwedaghin?an hadinh? ?Esdiny gweched ?egweyenižen, bets'enz nagwedint'i bid deni jedenidah sa?anah?insh chuh ?at'insh. ³ Gubadzed ?ats'edinh gwech'ez nenduw h chuh gajedinh, Nenden qungh ?enagwelish ?eyen telant'ih? Nenden Mary beyi hink'an becheliqi James belh Joses belh Judas belh Simon telant'ih? Bediziqi nexwetuw h jedilhts'ih telajint'ih?"

⁴ Sizi guts'en gadin h, "Gudinits'il?in danajegwelnish ?eyen ganents'in gheyalh ?eguh ts'edilhti, gan benenz nizan ?eyed hink'an belhtesiqi tuwh hink'an belhghedex tuwh dzanh lha gats'isen." ⁵ Lha jid gutuw h Gudinits'il?in bets'enz nagwedint'i bid deni sa?anawelh?insh guyal, gan deni jedenidah lhalah dzanh ch'idilni jid sa?anagubinlagh. ⁶ Lha jeyudidlanl gwech'ez lha gubanilil.

Sizi, ?elhch'ažnan gu?en nandih ?eyen, nandih jelt'ih ?elhjudeten ?elhanx gwetl'agubaghinlah.

?Eyed qwentex jixanaghejah hink'an qwentex ?eyuw h gwelex deni ?igwedelh?anx gwetuwh niyah. ⁷ Guyen ?elhch'ažnan gu?en nandinh jelt'ih jeyelhnadilh ?eyen guqajaghinish. Nentsen deni ch'ajeneŵeyog gweqa nagwedint'i gubetl'ax ghin?an hink'an nandih jelt'ih ?elhjudeten ?elhanx gwetl'agubaghinlah.

⁸ Gwetl'agubelih nenduw h gajunax gubelhnh, "Nents'in tezeh?az ?egun lha ts'eyan xežalnh, lha ?alhchens chuh xežalnh, lha seneya chuh nentezahdzash, gan dechen bet'ad nats'eyah dzan detuhtan. ⁹ Qi ?idaweh?az, lha ts'enz bits'edeltsish ?eyuy xežalnh. ¹⁰ Nents'in qungh nendaneh?az ?eyed qwentex gwanataht'as gwets'en ?eyed wehqi. ¹¹ Hink'an nents'in qwentex lha nendaxwets'uyah k'es lha nexwets'uzilhts'an ?eyed gubenalh nexweqi lhiz bech'anahghed ?eguh hink'an gubajixanaweht'as. Lha Gudinits'il?in bejeni južuwelhts'an jegut'in hink'ed gubets'enz hagunt'ih, ?eyed gweqa nenduw h gawehnax, ?eguh gubech'an nadežehyah jid gudzish hagwetat'ilh."

¹² ?Egu nents'in deni tuwh najedilh ?eguh deni ?ananajenentet'anx gwech'an najeduyax gweqa gubelh yajaghinlhtig. ¹³ Nentsen lhan deni ?ixadajenizud hink'an deni lhan jedenidah sa?anaguts'elax gughad olive nižt'an tlagh nentsel gutši jetlish chuh ?ajat'in.

¹⁴ King Herod ts'edinh ?eyen, Sizi beghuzi ts'edaghilhtish jigwedilhyan. Deni belhdan gajedin, "Guyen John deni tubi?aghinh?insh ?eyen ch'adejagh ch'iz nagušdiny gwech'ez nagwedint'i jid ?anat'in."

¹⁵ ?Eyun gajedin, "Elijah ts'edinh ?eyen hant'ih." Belhdan ?eyen, "Gudinits'il?in bedanagwelning, ?undidanh gajaghint'i gant'en hant'ih," jedinh.

¹⁶ Herod gwedežts'an belh gadin, "John ?elhats'enuwets'inh desnih ?eyen nagušdiny haguajagh."

Herod, John deni tubi?alh?insh ?eyen ch'ayedinlagh.

¹⁷⁻²⁰ John denilin ?egu nenduw h gagwat'in. Herod bunagh Philip be?ad Herodias ts'edinh, ?eyen yaxagweltin hink'an yelh tubi?ajagh. John Herod yets'en nenduw h gadin jid yeghanadedinh, "Lha ?egun hilih hananjagh, nunagh be?ad ghanasindah."

ʔEguh gwechʼez Herodias, John lha yuʼin hinkʼan chʼayedulax jid yuʼstʼin. Herodias ʔinlhetah jid Herod yetsi nadenizʼan. John nendatsʼulhtʼax nish, ʔeguh gwechʼez nendatsʼenilhtʼi. Gan Herod John yuzelhtsʼinsh, gwatish lha su xuldinh teguwelhchud gan yuzinlhtsʼan guntʼin. Gudinitsʼilʼin tsʼen su ʔegun jid yeda denilin ʔegweyenizen gwechʼez yininljed, ʔeyed hah su gweqa chʼatsʼedulax chʼa yaxiztan. ʔEyed gwechʼez Herodias lha jid John chʼayedulax guyal.

²¹ Xeninkʼan Herod ʔelhenagwedised, ʔeyed gweqa bedeni su ʔechʼan jinlin, ʔeyen belh ʔelhtsʼultʼax gwaʼanajedeni jinlin ʔeyen belh nen Galilee deni gubetsʼedilhti ʔeyen gubaghinzlay. ²² ʔEgu Herodias betsi nendaniyah hinkʼan guba naday. Herod belh gubaghinzlay ʔeyen jeyananaghedinsh.

ʔEyed hinkʼan King Herod tsʼiqi naday ʔeyen gayelhnih, “Nendidah xuzintʼin beqasudaghinhqed ʔeyi nentlʼaxetasnish.” ²³ Nenduwchuh gayelhnih, “Gudinitsʼilʼin beghuzi bid ʔinlhes ʔalhʼadesnish, Gagulhchugh gwaʼanadesni ʔeguh ʔelhtsʼih gwetsʼen nentlʼagughetasʼalh, guzintʼin hinkʼed.”

²⁴ Gatsʼedinsh belh beban tsʼen tinalgay hinkʼan gayelhnih, “Betsʼen nendidah qa xudetasqed?”

Beban xeded xuyenelzen ʔeguh baʼelhqagughedaltsʼed. Nenduwchuh gayelhnih, “John deni tubiʼalhʼinsh ʔeyen betsi qa xudughunlhqed.”

²⁵ Nenkʼeyed gagulhghen Herod yetsʼen nendanalgay hinkʼan gayelhnih, “Nenkʼedanh John deni tubiʼalhʼinsh ʔeyen betsi tsʼaychʼed tenizʼan setlʼaghunqalh guzestʼin.”

²⁶ Herod gatsʼedinsh ʔeguh gwa ʔinlhes gwadenildah selin, guyen gubaghinzlay ʔeyen gubenalh hinkʼan tsʼiqi yetsʼen xuldinh ʔeyed gwechʼez lha jid nagughetutsid guyal. ²⁷ Nenkʼeyed belh John betsi ʔelhatsʼenuwetshinlh gweqa suljes ʔinlhanx qungh nenchagh gwetlʼayaghinlhtin. ʔEyed qungh nenchagh

John yets'en niyah, nenk'eyed jiz ?elhayenenintsinl.
²⁸ Hink'an betsi ts'aych'ed teniz?an nendanayeningan.
 ?Eyi ts'iqi tl'ayaghinqan, nenk'egun beban
 yetl'ayaghinqan. ²⁹ John jeyelhnadilh ?eyen
 jijegwedilhyan belh bedatsagh qanajeşdil hink'an tsiyi
 xats'egughinlah ?egun sunijeyenilhtin.

Sizi deni ?esgunla tawzen gajenilt'ih ghedaghinlhch'el.

³⁰ Sizi ?elhanx gwetl'agubaghinlish ?eyen
 jeyananaghedil hink'an deni ?ijegwedaghinlh?in belh
 xujalt'in ?eguh gagulhchugh jeyelh nagwalnig.

³¹ Gwechugh deni lhan gubixudilh gwech'ez
 ?ejetayinlh ?eyed lha gughajizelh. ?Eyed gwech'ez
 gubets'en gadinh, "Natughujish gweqa ?ilhch'es tah
 lha gwetesjiz ?egun nighudilh."

³² Jadint'ah gugun lha deni gulih ?egun ts'i bid
 gwech'ajeninquin. ³³ Gwech'ajenqish deni lhan
 najeyulhts'id, nenk'eyed danh nents'in jetizqin ?egun
 jaghetiżnan, qwentex ?elhagh?eyuw h gwelex
 xadats'aghiżnan, nents'in naghajaqilh ?egun gubech'an
 ?eyed jenilzul. ³⁴ Naghajeżqin, dixaghiyalh ?eyed
 yedanx deni lhan chexizdil. Gangu shib lha
 bats'aghitan gajint'ih jid gubinlhtsan gwech'ez
 gubayeniż?an, ?eyed hah su gweqa gagulhanwh jid
 ?igubedetilh?in.

³⁵ Džanaş gu?en sa yanish hilin nini?an ?egu
 jeyelhnadilh ?eyen jeyeghen nixeninan hink'an
 gajeyelhnih, "Nenjan qwentex gwech'adeniżad,
 gwetized chu?agujagh. ³⁶ ?Ejuyan gweqa gugun nen
 ts'edilhts'ish ?eyed hink'an qwentex gwelex ?egun
 ts'eyan najuduqid qa?agubinlax," jeyelhnih.

³⁷ Gan nenduw h gagubelhnih, "Xun ?inlhitah
 gubadelhch'ulh."

Jeyets'en gajedinh, "Seneya lha?aguşed beqa
 ?anats'eş'in galhan telah bid lhiz şet'ish jeyuyan
 gweqa guba ?utaghaqelh?"

³⁸ Nenduw h gagubelhni, "Lhiz set'ish xulhan gulin hagunt'ih? ?Egweyenughudzanx gweqa denituwh nanaht'is."

Denitex xanajest'iz belh "Lhiz set'ish ?esgunla hink'an lhuy nanqih dzanh gunlin," jedinh.

³⁹ ?Egu Sizi jeyelhnadilh ?eyen nenduw h gagubelhni, "Gats'in nenduw h gajunax qa?agubulhax, tl'ugh deltsugh ch'ed lha?ajilhah ?elhidanajedichud ?elhagh?eyuw h nitl'ajedewelts'ilh."

⁴⁰ ?Egu deni ?inlhed hunded hink'an ?esgunla ?elhch'ažnan gajenilt'ih ?elhelh nitl'ajedilts'ih. ⁴¹ Guyi lhiz set'ish ?esgunla belh lhuy nanqih yinlhchud hink'an gudish yat'ax yetiž'in, beta ts'en ch'iqidadiny hink'an lhiz set'ish ?elhts'idayetilhqed. Qats'ay biyelhgwish ?eyi denitex xats'unih gweqa jeyelhnadilh gubetl'ayeqash. Nenguyi lhuy nanqih ?eyi chuh su gayinlagh jid denitex xayežni.



Sizi deni lhan ghedaghilhch'el.


⁴² Gats'in se?ajejagh jid nejanan. ⁴³ Hink'an guyen jeyelhnadilh ?eyen lhiz set'ish belh lhuy

beghets'aghizan nachejaghizdzay, qats'ay ?elhch'ažnan gu?en nanqih ganilt'ih jedilhben. ⁴⁴ Deyenžqi ?eyen dzanh ?esgunla tawzen gajenilt'ih hagughint'i.

Sizi tach'ed helgay.

⁴⁵ Nenk'eyed belh Sizi, guyen jeyelhnadilh ?eyen ts'i bid bech'an qwentex Bethsaida gwets'en najetuqi qa?agubinlagh, jalan ?eyen guqungh najetudilh gubelhni. ⁴⁶ Bech'anats'endil ch'iz xents'agutalt'ilh gweqa gudish dilhgwenlh tuwh gughinyah.

⁴⁷ K'an dzanh salhyiny šelin biny taniz hilin najaghinqin, hink'an xeded ?eguh nench'ed xedint'ah ninilts'ed. ⁴⁸ Gubedisets'ish gwech'ez ?ejet'ungh gubets'en gwagwelhnad. ?Egu ?ech'ilh?ah nagubenaghel?in.



Gubedisets'ish gwech'ez ?ejet'ungh gubets'en gwagwelhnad.

K'an dzanh yalhqalh ?egu gubets'en tach'ed gheyalh gubets'en helgay, gubech'ed tedalgish ?egu jeyinlhtsan; nandinlh hat'in jigunižlid gwech'ez xajaghinžel.

⁴⁹⁻⁵⁰ Gats'in nandinlh jinlhtsan jeyenižen gwech'ez ?inlhes gunchagh jid jenilhjud.

Nenk'eyed belh nenduwg gadinh guts'en jaghini, "Lha gweqa nuwelhjux hat'eh¹⁵ xungh? Sid hast'in; lha nilhjed hah." ⁵¹ Gubets'en ts'i bighinyah.

¹⁵ 6:50 K'es gulih.

Nenk'eyed danh nilhts'i naxedalt'i gwech'ez ?inlhes lha gwanijilil. ⁵² Gwech'an lhiz set'ish xuyinlhad ?egwechuh lha ?egwejeyenizini. Lha gubini tegughilchelh.



Sizi tach'ed ghegish gubanaghelgay.

Sizi Genesaret gwet'in jalan ?eyen sa?anagubinlagh.

⁵³ Gunan nen Genesaret ts'egwedinh gwets'en neghajeninquin belh ts'i jijaghižtl'un. ⁵⁴ K'an dzanh ts'i bixajaghindil belh Sizi nats'ulhts'id. ⁵⁵ ?Eyed nen gagulhchugh Sizi niyah ts'edinh denituwh nats'aghižnan, nents'in hant'ih jits'egwedilhyan belh nendan jedenidah lha jid najuya guyah ?eyen ?egun yušitil ch'ed gubets'enilah. ⁵⁶ Hink'an nents'in gheyalh, qwentex guntsel gwelex ta?agunt'ih, qwentex gunchagh belh ya?anxw nen ts'edilhts'ish, ?eguh deni jedenidah ?ets'uqid gwelex ?eguh nidaguts'aghili. Yets'enz k'abeh dzanh ?ijagheduwenax jedinh ?etijededlih. ?Egu nendan yets'enz ?ixedaghinax ?eyen gats'in sa?anajejagh.

7

Nendid bid ts'edetsen ts'aghedeltsish.

¹ Guyen Pharisee hink'an Deni ?ijegwedelh?anx belhdan qwentex Jerusalem xajaghindil. Sizi jeyeghex chejaghizdil. ² Sizi jeyelhnadilh ?eyen belhdan lha lajedelhdx chu jejeneyan guts'enaghinh?in. Gats'egulh?in ?eguh lha gajinil.

³ (Guyen Pharisee belh Jews gats'in lajedeldish hink'an ?ejeyinsh jegulh?in. Yedanx ?elhch'iz ?eguh gajet'in lha jijedešnish. ⁴ ?Ets'uqid gwelex xadanajedilh ?egun lajedeldish hink'an ?ejeyinsh. Nenduw h chuh gajegulh?in, bidaqash belh beš bitunalten belh bitunizilh gadant'i tah tinajelish hink'an jeyi?anat'insh jegughinh?an chu ?ajint'ih.)

⁵ ?Eyed gwech'ez Pharisee belh Deni ?ijegwedelh?anx Sizi jeyudilhqed, "Xulht'i jid nelh najedilh ?eyen lha lajedelhdx chu ?ejeyan, yedanx ch'iz gats'egulh?in ?eguh lha gaješt'in?"

⁶ Sizi gagubelnih, "Isaiah ts'edaghini Gudinit's'il?in danagwelnish ?eyen ?alh?anexwelhnih hadaghini su ta?anaht'in xedetalh?inlh. Nenduw h gadinh destl'es ch'ed jidagwedilah: 'Israel gwet'in gubeži dzanh bid sejedilhti, gan gubini ?eyuw h sech'a denizad diž?an. ⁷ Gants'iz sets'en ts'idaneš jegulh?in. Xedanijegwedilyah ?eguh dzanh gwech'ih deni ?ijegwedelh?anx.'

⁸ Gudinit's'il?in nexwanigughenilah ?eguh jidalhghel hink'an yedanx ch'iz xedanigwedenelhyah ?eguh dzanh gwech'ih ta?anaht'in."



Nendid gats'i tinajeyelish hink'an jeyi?anat'insh.

Nenta belh nemban gubeduwelhti.

⁹ Nenduwch chuh gagubelhni, "Yedanx ch'iz gaht'insh ga'wehnax gweqa Gudinit's'il'in nigughenilah ?eguh dehni xedeyenedzen til gughetehtsig. ¹⁰ Moses ghinli nenduwch gadinh, 'Nenta belh nemban gubeduwelhti,' hink'an, 'Nendan beta k'es beban ts'udinla ?eyen ch'ats'edetalilh jid gwets'enž hagunt'i.' ¹¹ Xun ?eguh deni ?inlhanx beta k'es beban ts'en nenduwch gadinh dehni, 'Ganendid hist'in bid nelh?agwetanilh tesaghint'i ?eyi Gudinit's'il'in ts'en xeteži'an,'¹⁶ ¹² ?Eyed gu?en lha jid beta k'es beban belh?awet'in guyah sinlhtsin. ¹³ Yedanx ch'iz xeda nigwedenedhyah gwech'ih dzanh ta?anaht'in, Gudinit's'il'in bejeni nenduwch xuldinh ?eguh lha xagwelh?ah yalhin. Lha?agulhah nenduwch gagunt'ih jid gwaghex ta?anaht'in."

Ts'eyan gats'i nezun.

¹⁴ Sizi shunchuwch jalan gughex najedilh ?eyen guqanajadiny hink'an gagubelhni, "Ganexwenilhan Sužewelht's'an! Nenduwch gadgetasnilh ?eguh sul ?egweyenuhsin. ¹⁵⁻¹⁶ ?Inlhitah ts'etilhni ?eyi bid lha jid detsen ts'aghedulstilh guyah hagunt'i. Gan guntsen jid nanits'ežed gwech'ih ta?anats'et'in, ?eyi hah bid detsen ts'aghedetalstilh."

?Eguyenižen gan Gudinit's'il'in nexwanigughenilah gwa ?ananantint'anx ?eguh jid detsen xedetaghanltsilh.

¹⁷ ?Eguh ch'iz jalan ?eyen gubech'a qungh nendananjah, guyen jeyelhnadilh ?eyen nagweding bech'inits'ežig gant'i bid gubelh nagwalnig ?eyi, su xuldinh ?eguh gweqa jeyudilhqed. ¹⁸ Nenduwch gagubelhni, "Xulht'i jid lha teguwelhcholh hadehni. Deni ?inlhitah tilhni ?eyi bid lha jid detsen xedulstilh guyah hagunt'i. ¹⁹ ?Eyi lha bedzi biz ništ'ig

¹⁶ 7:11 ?Inlhi tah Gudinit's'il'in ts'en xetilhtsed ?eyi Korban ts'egwedinh.

gan bebed biz nitl'ig hat'ish, hink'an ?eyi ?ech'ilh?ah deni ch'an ?at'insh." (?Egu ts'eyan gats'i lha xulht'ih nih hadaghini.)

²⁰ "Guntsen jid nanits'ezed gwech'ih ta?anats'et'in ?eyi hah bid detsen ts'aghetaltsilh. ²¹ Nanits'ezed gwets'enz, guntsen nanits'ezed, tintah ?ats'et'anx, ?ets'ene?insh, ch'elhts'ededlax, ?elhghanats'egwedenet'insh, ²² ts'en nats'egwedil?ah, ch'its'edanx, nelhts'enet'ax; gan xuts'elt'in guntsen ta?anats'et'in lha guts'en ?elhagh?eyuw hilih ta?agunt'ih, ?elhts'en dats'intsen, yayagh jid ?elhghayats'eltig, gwechugh yadi jid xedadanits'edzed, lha deni ch'ih ts'eniized. ²³ Ganendad gats'at'in ?eyi hah bid detsen ts'aghetaltsilh," gubelhni.

Sizi ts'iqi betsi se ?analagh.

²⁴ Sizi ?eyed gwanajeti?dil hink'an qwentex Tyre ts'egwedinh gughen qungh gwez?an ?eyed jenindil. Lha ?inlhanx nents'in sedah ?egweyenuzin gut'in gan lha jid nents'in sedah ?eyed deni ?igwenuwez'in guyal.

²⁵ Guyen ts'iqi ?eyen, Sizi nents'in hant'ih jigwedilhyan. ?Eyen betsi nentsel ?eyen nentsen ?anayeli gwech'ez ?eyed niyah hink'an yenadas nat?ilegwedilyah. ²⁶ Guyen ts'iqi ?ets'en deni ?eyen¹⁷ ch'ih yets'en jizah. "Set?i guyi nentsen ?eyi bech'anayenughuyud," nih ?etidedlih.

²⁷ Nenduw h gayelhni, "?Esqax sid nejudan qa?agubinlax. Guts'eyan lhin ts'en tinilhguy ?eguh lha ?egun hilih xungh."

²⁸ "Sizi, ?alh?adin h hadini. Lhin ?eyi chu la ch'ededan yes naghingwish ?eyi nayeldilh hat'insh."

²⁹ Nenduw h gayelhni, "Nenk'ed naghindalh, ?eguh gadinish gwech'ez guyi nentsen nentsi

¹⁷ 7:26 Guyen ts'iqi Greek gwet'in ?eyed nen Syrian Phoenicia ts'egwedinh he?dlan.

yech'ananjah." ³⁰ ?Egu qungh gunaghejah ?egun betsi lha xulht'ih chu taš šetin yanaghejah.

Sizi deni lha ?editš'iny sa?analagh.

³¹ Sizi qwentex Tyre gwech'ananjah, ?egun gu?en qwentex Sidon gughananjah; ?egun yatsen Galilee biny ?eyed chuh gughananjah, ?egun nen Decapolis gwets'en niyah. ³² ?Eyed deni belhdan deni ?inlhanx lha ?edeštš'iny hink'an šenqay yalhtig ?eyen jeyets'en jeyenilhtin hink'an yech'idulnish gweqa jeyinadedilh.

³³ Guyen deni lha ?edeštš'iny ?eyen deni jalan guba?eyud niyaghilchud ?egun Sizi yedzagh ?anilht'id yina?elhged, ?egun tizi hink'an yetsul ?ixedaghinax.

³⁴ Gudish yat'ax yetiž'in gughad, ya yeniž'an gwech'ez yades nanagheji, hink'an yets'en gadinh, "?Efatha!" (?Eguh nenduwgh gadinh hadaghini, "?Edughunts'anx, yalhtig naghundlanx!") ³⁵ Nenk'eyed danh bedzagh qedetilghel, ?editš'iny šelin, sul yalhtig našdlin.

³⁶ Sizi gagubelhni, "Lha ?inlhanx gubelh gweželhnig."

?Elhch'iz gagubelhdenish gan gu?en jid gwayajetilhtig. ³⁷ Gunchagh jid lha gwanijilil. "Gagulhchugh jidinsun jid ?anat'in. Lha ?ejedeštš'iny ?eyen ?ejeditš'iny nagubelhtsish; lha yajelhtig ?eyen yajelhtig nagubelhtsish," jedinh.

8

Sizi deni diny tawzen gajenilt'ih ghedaghinlhch'el.

¹ ?Eyed shunchuwgh deni lhan chexiždil. Ts'eyan yajenilnhan gwech'ez Sizi jeyelhnadilh ?eyen guqajaghini hink'an gagubelhni, ² "Yedanx tad dzin selh jedetilhtš'i, ts'eyan yajenilnhan chu ?ajejagh gwech'ez gubaya?anasjagh. ³ Guyen belhdan nižex xadaježdil ?eyen lha nejidinl chu najetudilh qa?agubešdlagh hink'ed nidajetatl'elh hajint'ih."

⁴ Guyen jeyelhnadilh gajedinh, "Yanuwh dezilts'ih hat'ih, nents'in ts'eyan se?alhan teghalchelh hadinih?"

⁵ Sizi gubudilhqed, "Lhiz set'ish xulhan heht'in?"
 "Inlhed ch'ilhghilh ganilt'ih hit'in," jedinh.

⁶ Gajenilhan nench'ed nitl'ajedewelts'ilh gubelhnih. ⁷Egu lhiz set'ish gulin ?eyi bech'ez gudish beta ts'en "Xwechanal'in," nih xents'anagughelt'ih hink'an ?elhghadayetilhqed hink'an jeyelhnadilh ?eyen denitex xajeyunish gweqa gutl'ayeqash, ?eguh gajejagh. ⁷ Lhuy nentsel gulin ?eyi chuh su gayinlagh, gudish beta ts'en xents'anagughelt'ih hink'an jeyelhnadilh ?eyen denitex xajeyežni. ⁸ Gats'in sa?ajejagh jid ?ejaghiyan. Gwech'iz jeyelhnadilh beghets'aghizan ?eyi qats'ay chugh ?inlhed ch'ilhghilh ganilt'ih jedilhben. ⁹ Deni diny tawzen gajenilt'ih hagughint'i. Nenk'ed, "Natuhdilh," gubelhnih.

¹⁰ Guyen jeyelhnadilh gubelh ts'i binaghejah hink'an gunan qwentex Dalmanutha gwets'en neghaježqin.

Sizi Pharisee belh Herod guba bi lhiz ts'enisoylh ghajughuwetan gubelhnih.

¹¹ Guyen Pharisee ?eyen, Sizi jeyets'enindil hink'an ?axudulni k'es ?axuwelnax jeyenižen gwech'ez gajeyelhnih, "Inlhetah jid nudughudlanx gweqa Gudinit's'il'in bets'enz xagwedalts'ed lha gwanit's'ešlish nexwigwenughulh'in."

¹² Guts'edišdinh gwech'ez yades nanagheji hink'an gadinh, "Xugunlht'i gweqa nenden deni nenduw h jadex ?eyen lha gwanit's'ēdlax gubits'egwenuwelh'in gweqa ?ejudelhqed hanh? Sid, ?elh?agwedinh jid ganexwelhdetasnilh, lha nexwits'egwenentalh'inlh!"

¹³ ?Egu Sizi jeyelhnadilh belh deni ghanajaghetišdan. Ts'i binajadil hink'an gunan tachi biny jitaghilin ?egwenz gwets'en gwech'ajeninqin.

¹⁴ Guyen jeyelhnadilh ?eyen ts'eyan jaghetalhnih jinajelhned, gan lhiz set'ish ?inlhi dzanh ts'i bighi?a.

¹⁵ Sizi gagubelhnih, "Inlhes xedaxuwehtan. Guyen

Pharisee belh Herod ?eyen guba yeast cake ghaxuŵehtan." ¹⁶ Sizi xuldinh ?eguh gwanayajaltig hink'an nenduw h gajedinh, "Lha lhiz šit'in gwech'ez hadaghini."

¹⁷ Xuldinh ?eguh lha tejegughilcholh jid yajelhtig gwech'ez Sizi gagubelhnh, "Xulht'i gweqa lha lhiz šeht'in ?eyed gwayalhtig hanh? Shunk'ah lha gweželhtšax k'es lha teguŵeželhchud telaneht'ih? Nexwetši deghints'i šelin telaneht'ih? ¹⁸ Nexwenagh gulin gan lha gweželhtšax; nexwedzagh gulin gan lha ?edežehtš'anx. Lha ?egwinayenežehdžanx telaneht'ih. ¹⁹ Deni ?esgunla tawzen gajenilt'ih (5,000) ?eyen guba lhiz šet'ish ?esgunla ?elhtš'idašilhqed beghets'aghizan ?eyi qats'ay xulhan deželhben?"

Gajeyelhnh, "?Elhch'ažnan gu?en nanqih ganilt'ih."

²⁰ "Ch'iz deni diny tawzen gajenilt'ih (4,000) ?eyen guba lhiz ?inlhed ch'ilhghilh ganilt'ih ?elhtš'idašilhqed ?eyi qats'ay chugh xulhan deželhben?"

Gajeyelhnh, "?Inlhed ch'ilhghilh ganilt'ih."

²¹ Gubets'en gadin, "Shunk'ah hanh lha teguŵeželhchud?"

Sizi deni lha gwaš'in sa ?analagh.

²² Neghaježqin hink'an qwentex Bethsaida ts'egwedinh ?eyed jenindil. Hink'an deni belhdan deni ?inlhanx lha gwaš'in ?eyen jeyets'en jeyenilhtin hink'an Sizi yixedeŵenax gweqa jeyidenindil. ²³ ?Egu Sizi guyen deni lha gwaš'in ?eyen yela hinlhchud hink'an qwentex gwe?anwh niyagheniyah. ?Egu, guyen deni, yenagh ch'isezi hink'an yenaghch'ed nadilhni belh yudilhqed, "?Inlhitah hinlhtšan hanh?"

²⁴ Ninadenit'an hink'an gadin, "Deni gubenis'in ?eyen gangu dechen naxena sagwelagunt'ih."

²⁵ Shunchuw h ?inlhed yenaghch'ed nanadilhni. ?Eguh hink'an benagh sa?anajagh, su natist'iz. ²⁶ Sizi gayelhnih, "Nenqungh natughunja. Lha qwentex nasaghindalh."

Sizi ch'ats'edetalilh gwanagwelnic.

²⁷ Sizi belh guyen jeyelhnadilh ?eyen yadish dželh qichen qwentex Caesarea Philippi ts'egwedinh jenindil, ?eyed qwentex gwe?anwh najediždil. ?Eguh jadelh gubudilhqed, "Deni nendan hanest'ih ts'edenish hanh?"

²⁸ Gajeyelhnih, "Deni belhdan ?eyen John deni tubi?alh?insh ?eyen ninlin jedenish. ?Eyun ?eyen Elijah ninlin jedenish, hink'an belhdan ?eyen deni ?inlhanx Gudinit's'il?in yeda nagulnic gweqa ?etex xayaghinlhtin ?eyen hanint'ish, jedinh."

²⁹ Gubudilhqed, "Gan xun ?eguh nendan hanest'ih dehnh?"

Peter ?eyen gadinh, "Nin Gudinit's'il?in nexwets'en gwetl'anaghinlhtin ?eyen hanint'ih."

³⁰ Sizi gubeghanadadiny, "Lha deni ?inlhanx ?eyen hast'ih dežehnh."

³¹⁻³² Sutsel ?ejedut's'anx gweqa nenduw h gadinh jid ?igubedetilh?in. "Sid Deni gudes xaghinyah nesdlin, gagulhanxw gundaž jid ?etisets'etalh?inlh hink'an t'agultinqi belh yašalhtig ?aghendes jinlin belh Deni ?ijegwedelh?anx jinlin ?eyen lha sejutašt'in, sech'anajedetadelh hink'an ch'asejedilagh ch'iz tad dzin ghili nagutasdinh has."

?Eguh hink'an Peter yu?an hilin niyaghinlchud hink'an gayelhnih, "Lha nenduw h gadežinih."

³³ Nen'eyed belh Sizi, Peter yech'anadizah hink'an jeyelhnadilh ?eyen gubets'enil?ah ?egu Peter yets'en najizah, "Lejab, ?eyuw h sagwe?inz nayah! Deni ch'ih dzanh naninžed. Lha Gudinit's'il?in bech'ih nanišinžed hanint'ih hany!"

Gwagwelnah ?egwechuh Sizi xugunlht'i jid denitaghanlih ganelhnih ?eguh gwech'ih ta?anataghant'in.

³⁴ Jeyelhnadilh ?eyen belh gu?anz deni lhan najedilh ?eyen guqajaghini hink'an nenduwh gagubelhnh, "Nendan senentuya gust'in ?eyen lha xedadanitasdzed chu ba?elhinilhjes beganstdlangh ch'ed tenayaghižtan hink'an sech'ih tayalh han.

³⁵ Ganendan xeda ch'ih denilin ?eyen jidetanish. Ganendan sanagwelnig gweqa ch'adejagh ?eyen detajish. Seqa ch'adejagh ?eyen chuh detajish.

³⁶ Ganendan lha betsin dijish chu nenjan nenqay didah gats'i chexilhtsed ?eguh xugunlht'i jid guwezu. ³⁷ K'es nendidah bid betsin qa ?elhch'ixaguwetalnish?

³⁸ Nenjan nenqay ?ananats'enentet'anx hink'an lha Gudinit's'il'in xats'ilh'ah chu denits'ilin hagunt'ih. Gudinit's'il'in belizans belh seta bets'enz xaghindin belh guts'en natasdadh. Ganendan sid belh sejeni gha junjan ?eyen sid chuh gubaxutasjalh."

9

Sizi beneš ?ets'en ?anajagh.

¹ Sizi nenduwh gagubelhnh, "Ts'idaneš jid ganexwelhdetasnilh, k'an nenjan najedilhyah ?eyen belhdan lha ch'ajedešnax jegwelhqen danh Gudinit's'il'in gwa?anadetanilh ?eyed dzin jegwenentalh?inlh."

² Dzin ?elhch'antay ganilt'ih ghili Sizi, Peter hink'an James belh John chu, dilhgwenlh didinaž ?egun gubenilah, hink'an jadint'ah gunalh beneš ?ets'en ?anajagh. ³ Bets'enz ?inlhesh gunchagh jid bech'ed tesadindin jid lhek'el šelin, nenduwh nenqay ts'enz lha jid ?eguh galhik'el ts'ulhtsilh guyah ?egun

gant'ih. ⁴ Elijah belh Moses gulhts'edinh ?eyen¹⁸ deni ?ijaghediltsan hink'an Sizi jeyelh yalhtig.

⁵ ?Eyed hink'an Peter, Sizi nenduw h gayelhnih, "Sizi¹⁹ Ninlin, nenjan guzun nexwenilah.

Nenk'edanh xun tan nelht'ih nin belh Moses belh Elijah ?elhelhch'ih nexwaghulben." ⁶ Nilhjud lha ?axudulni guyal gwech'ez nenduw h gadinh hadaghini.

⁷ Gubi sa qw'es ?inh ghi?an hink'an qw'es yi Gudinit's'il?in guts'en gadinh, "Nenden seyi helin gunchagh jid xunest'in. ?Eyen xuzuwelhts'an."

⁸ Xentsel lha deni najiltsil. Sizi xedint'ah dzan h ?eyed nazed.

⁹ Dilhgwenlh didinaž gwets'enž gweninajadelh ?egu Sizi gagubelhnih, "Deni gudes xaghinyah ch'adejagh ch'iz ninadijah ?eguh hink'an shunk'an gwenaghelh?in ?eyed gwanagulhnig." ¹⁰ Nenduw h gagubelhnih ?eguh jadint'ah gwa ?elhelh nayajaltig, hink'an nenduw h gajedinh, "Ch'adetanilh hink'an ninadetadalh nih, ?eguh xuldinh hadaghini?"

¹¹ Hink'an Sizi jeyudilhqed, "Deni ?ijegwedelh?anx xulht'i gweqa nenduw h gajedenish, Elijah ?eyen sid xanatadalh han?"

¹² Sizi gagubelhnih, "Elijah ?eyen su ?ech'an xanatadalh, ?eyen gagulhan sa?anagwetalilh. Xulht'i jid hagunt'ih, Gudinit's'il?in bejeni destl'es gwech'edets'ezjez ?eyi nenduw h gagwedinh, 'Deni gudes xaghinyah ?eyen gwechugh jinats'enentalhtanx hink'an bets'uts'edetadlanx.' ¹³ Gan ganexwelhusni, Elijah gant'en ?eyen nenduw h xaghinyah. ?Eyen chuh ganenduw h xujeyulhax jegust'in ?eguh gajeyaghinh?in, ?eyed su gagwedinh Gudinit's'il?in bejeni destl'es gwech'edets'ezjez."

¹⁸ 9:4 Moses belh Elijah Sizi nenjan nench'ed našiyah gwech'an yedanx danh denijaghinli.

¹⁹ 9:5 Sizi Si ?igwedelh?anx jid ts'uzin.

Sizi ?eşqi nentsen yixanaghiyud.

¹⁴ Sizi jeyelhnadilh belhdan, gwedu?ajint'ih ?eyed gwets'en gwebanajedidil. ?Eyed deni lhan chexizdil, dezan Deni ?ijegwedelh?anx ?eyen belh jeyelhnadilh ?elh?ijedelnax. ¹⁵ Deni lhan, Sizi lha jeyeqa jeyeti?in, jeyinlhtsan belh gwajenini gwech'ez ?aghal jeghanalh jeyedixiznan.

¹⁶ Sizi gubudilhqed, "Dideqa ?elh?idelhnax hadahni?"

¹⁷ Deni tex ?inlhanx ?eyen nenduwg gadinh, "Nin deni ?igwedinh?anx ninlin, nenden seyi nents'en nilhtin ?eyen nentsen ts'enz şelin ?eyed gwech'ez lha yalhtig şelin. ¹⁸ Hink'an guyi nentsen yilhchog, nench'ed nayelht'ish hink'an bezi guwish xadanelzulh, hink'an beghu ?elhidelhk'es hink'an beneş ?inlhes ?elhch'edenog. ?Eyed hah nelh najedilh ?eyen sa?anajeyulax gubelhesnih gan lha jid nentsen jeyech'anuweyud gual."

¹⁹ Sizi gagubelhnih, "Deni nenduwg k'an deni nelhin, ?esdiny lha gwetah gudihdhan. Xugunşed lha nexwinişestş'id chu nexwelh deni tasdlilh? Sets'en ghelhtilh!"

²⁰ Hink'an guyen ?eşqi ?eyen Sizi jeyets'en jeyenilhtin. Sizi yinlhtsan belh nentsen ?eyi ?eşqi nench'ed nayaghinlht'i. Delteş hink'an bezi guwish xadanelzulh ?elhanx naxedetelmilh.

²¹ Sizi yeta yudilhqed, "Xugunşed ?eguh gaghint'i han."

Nenduwg gayelhnih, "?Eşqi helin danh ?eguh gat'in han. ²² Xenchuh tşiyedelht'ish, xenchuh tayelht'ish, ch'ayedulax qa?ayelh?in. Sa?anaghunlax gwet'in hink'ed nexwaye?ananenjagh, nexwelh?aghunax."

²³ Sizi nenduwg gayelhnih, "Xudinlnih hadinih, 'Sa?anaghunlax gwet'in hink'ed,' dinih ?eguh!"

Ganendan set'ayenintan ?eyen ba gagwetanilh hagunt'i, lha ?inlhi t'anentasdalh han."

²⁴ Nenk'eyed danh, guyen beta jaghinish, "Nent'ayenestan gan gu?en jid nent'ayenestan nasughunlhtsilh."

²⁵ Sizi beghex gu?en jid bits'ughetizdil, hink'an nentsen yeghanadiny gadinh, "Nentsen ninlin nenden lha ?edit's'iny hink'an lha yalhtig sinlhtsin ?eyen bech'ananindash, lha gwech'iz binaxedežindanx."

²⁶ Nenk'eyed danh nentsen xaghizel belh guyen beneš gwelan ?elhch'edunog qa?ayinlagh hink'an yech'ananjah. ?Ešqi ?eyen ?inlhes datsagh jinil?in šelin. ?Eyed gwech'ez deni lhan nenduwg gajedinh, "Ch'adejagh han." ²⁷ ?Eguh hink'an Sizi yela hinlchud yelh?at'in jid ninadijah.

²⁸ Sizi qungh nendananjah. ?Eguh hink'an jeyelhnadilh belh jadint'ah ježlin hink'an jeyudaghinhqed, "Xulht'i xun lha jid nentsen bech'anughujud guyal?"

²⁹ Nenduwg gagubelhni, "Nendid gant'i xents'agult'ih ?axunelt'in jid deninilin ?eguh dzanh jid deni ch'ats'eneyog hagunt'i."

Sizi nagutadinh gwanagwalnig.

³⁰⁻³¹ ?Eyed jadint'ah gwanajetišdil hink'an nen Galilee dzidzajenindil. Jeyelhnadilh ?igubedelh?anx gwech'ez lha nents'in hajint'ih ?aguts'eyenužin gut'in. Nenduwg gagubelhni, "Deni la sets'aghilhtin jid sech'an ninats'edetadalh, ch'asejedilagh ch'iz tad dzin ghili nagutasdinh." ³² Lha xuldinh ?eguh ?egujeyenižinl, gweqa jeyudetalhqed chuh jijenilhjud.

Nendan ?ech'an weli gušt'in ?eyen ?ech'ilh?ah talilh.

³³ Gugun qwentex Capernaum ?eyed najaghindan. Qungh nendajagheninan hink'an gubudetilhqed, "?Eten xahnalh, dideqa ganexwenilhan ?elhinadehdilh

hadahni." ³⁴ Nendan ?ech'a yadi helin jedinh gweqa ?elhinajedadilh gwech'ez lha jeyets'enztijish.

³⁵ Sizi natl'adadah belh jeyelhnadilh guqajaghini hink'an gagubelhni, "Nendan su ?ech'an weli gušt'in ?eyen su ?ech'ilh?ah talilh hink'an deni gats'in nadadetalnish."

³⁶ ?Ešqi nentsel la hinlhchud hink'an gut'aniz niyenilghay hink'an nenduw h gagubelhni,

³⁷ "Ganendan nenden ?ešqi nentsel gajint'en gangu sid nesdlin gagunt'ih jid nendayuniyah hink'ed, sid nendasuniyah gagwetat'ilh. ?Eguh ganendan sid nendasuniyah ?eyen lha sid dzanh nendasuyal, guyen nexwets'en gwetlasaghinlhtin ?eyen chuh nendayuniyah gagwetat'ilh hagunt'i."

³⁸ Sizi jeyelhnadilh ?inlhanx John ts'edinh ?eyen gayelhni, "Sizi, deni ?inlhanx nughuzi bid nentsen deni ch'adaneyud naghil'in. Lha nexwelh nas?as gwech'ez naxedughult'ax qa?aghil'in."

³⁹ Sizi gagubelhni, "Lha naxedulht'ax qa?ašeht'in. Ganendan sughuzi bid guzun jid ?anat'in ?eyen lha jid guntsen jid sayawelhtig guyah hant'ih, ⁴⁰ ganendan lha xwech'an ?adešdinsh ?eyen nexwets'enz ?adedinh han. ⁴¹ Ts'idaneš jid ganexwelhdetasnilh, sets'enz ninlin gwech'ez, ganendan gangu sid nesdlin gagunt'ih jid tu nižq'ež naninhchud hink'ed, seta yech'ixetalhtsilh han. ⁴² Ganendan ?ešqi ?inlhanx nenden gajint'en, set'ayenetan ?eyen, ?anananentut'anx qa?ayelh'in hink'ed, nendan ?at'in ?eyen tsi deninchagh beqw'es bits'aghižtl'un k'an tats'elht'ax dzanh jidaltšen. Gats'inlagh hink'ed ch'i'in jid gwetalhqen. ⁴³⁻⁴⁴ Nela ch'es bid ?anananentint'anx hink'ed xaghulht'aš, nela ?anilht'id belh guyax tsilhyax lha nagwenešas ?egun tiyash gwech'a sa?agunt'ih hagunt'i. ⁴⁵⁻⁴⁶ Nenqi ch'es bid ?anananentint'anx hink'ed xaghulht'aš. Nenilchuny ?eguh, nenqi ?anilht'id belh guyax tsinents'edelht'ax gwech'a sa?agunt'ih hagunt'i."

⁴⁷ Nenagh ch'ēs bid ?ananentint'anx hink'ed xanughun?alh, nenagh ?inlhi dzanh belh gudish nench'ez ghinyalh ?eguh, nenagh ?anilht'id belh guyax tšinent's'edelht'ax gwech'a sa?agunt'ih hagunt'i.

⁴⁸ ?Egun gagulhnaž gu gubetayinlh jelh gagulhnaž jedetak'en.

⁴⁹ "Deni ?ananajentat'insh gats'in Gudinit's'il?in benadas najedetalyalh hagunt'ih. ⁵⁰ Lesal nezun hat'ish gan ?elhidelnax ?eguh gangu lha lesal žagulqen gagunt'ish, xulht'i jid bežagwelqen nagwetaghanlhtsilh. Lha deni ts'en guntsen tegwedežah?alh chu lesal belh tuhnish."

10

Sizi ?elhelh tubi?ajet'insh gwayalhtig.

¹ Sizi ?eyed gwanatisdzah hink'an nen Judea gughananjah hink'an yeqox Jordan gwa gunez ninanjah. ?Eyed chuh deni lhan jeyixughiždil, hink'an ?eguh gat'insh ?eguh ganatišt'in, ?igubedetilh?in.

² ?Egu deni belhdan Pharisee gulht's'edinh ?eyen jeyixughiždil. Hink'an ?axudulni jeyenižen nenduwg gajedinh jeyudetilhqed, "Deni ?inlhanx be?ad ?eyutulht'ax gušt'in, lha gweqa ?agwedešdinh telagunt'ih?"

³ Nenduwg gagubelhnih gubudilhqed, "Moses nexwanigughenilah ?eguh xugweldinh?"

⁴ Nenduwg gajedinh, "Guyen deni be?ad ?eyutulht'ax gušt'in ?eyen, ?elhch'ajetat'es gweqa destl'es ch'idilni ?eguh hink'an ?elhch'ajetat'es gwedinh nexwanigugheni?an."

⁵ Sizi gagubelhnih, "Xun gwechugh lha denich'ih nišed gwaneš Moses nenduwg nigughenilah. ⁶ Gan su ?ech'an Gudinit's'il?in nenqay ?egunlagh danh, guyen deyenž belh tš'iqi ?agubinlagh. ⁷ ?Eyed gwaneš guyen

deni ?inlhanx beta belh beban guch'atayalh, hink'an be?ad chu ?elhghanajetaqilh. ⁸ ?Eyed gu?en lha nandih jilt'ish gan gangu ?inlhanx lajint'ish jetalilh.'

⁹ Gudinits'il?in deni nendan ?elhghen nigubenilhtin ?eyen lha deni ?inlhanx ?elhch'itigubetalhtilh."

¹⁰ Qungh nendajenindil ?eguh hink'an guyen jeyelhnadilh ?eyen Sizi ?eyed gwa najeyudilhqed.

¹¹ Gagubelhnih, "Ganendan be?ad ?eyutilht'i hink'an ts'iqi ?eyun belh bitu?anajagh ?eyen be?ad ts'en ?anananentet'anx hagunt'ih. ¹² Hink'an ts'iqi xeded beqen ?eyutilht'i hink'an deyen? ?eyun belh bitu?anajagh, xeded beqen ts'en ?anananentet'anx hagunt'ih."

Sizi ?ešqax gubaxents'anagughelt'ih.

¹³ Gubech'its'edulnish gughad guba xents'agutalt'ilh jeyenižen gweqa deni lhan Sizi jeyets'en ?ešqax jintsel xajaghilah, gan guyen jeyelhnadilh ?eyen najeyeniž?en. ¹⁴ Sizi, jeyelhnadilh ?eyen gajet'in gubinlhtsan, lha gut'in ?ats'et'in gwech'ez gadinh, " ?Ešqax jintsel lha sech'aghagubenežeh?an chu sets'en najudilh qa?agubelhax. Nenden gajint'en Gudinits'il?in gubets'enz hajint'ih. ¹⁵ Ts'idanesē jid ganexwelhesnih, ganendan lha gudish nench'ez, ?esqi nentsel gant'en ch'ih gudidlan hink'ed, lha ?egun tašalh hagunt'ih." ¹⁶ Hink'an ?ešqax ?inlhanx liny hilhchug hink'an bela bid gubech'idilnish hink'an gubaxents'anagughelt'ih.

Xulht'i jid deni gwetuwh jegulyuž ?eyen gudish nench'ez ?ajegwetalilh.

¹⁷ Sizi k'an dzanh gwech'anatalgish ?egu deni ?inlhanx ?aghal ghelgish nenk'egun yenadas betšigwed bid naghetled hink'an nenduwh gadinh yudaghinhqed, "Deni ?igwedinh?anx jid ninzun. Xutasnih jid Gudinits'il?in bets'en ?agwetalilh has?"

¹⁸ Sizi gayelhnih, "Xulht'i gweqa sid nesun dinih hany? Lha ?inlhanx nezun hilish xungh, Gudinit's'il?in xedint'ah dzanh nezun hagunt'ih.

¹⁹ Gudinit's'il?in nexwanigughenilah ?eguh ?egweyenizen telanint'ih. Lha deni ch'adezinlax. Bitu?anenjagh ch'iz lha ts'iqi ?eyun belh nasi?as. Lha ?enezin?insh. Lha xunts'id jid xeda k'es ?eyun ghanagwezinlnig. Lha deni ?inlhitah yedilhti ?eyi, nanin?ax jid ghunlhchud qa?asint'in. Nenta belh nemban gubedezinlhti hink'an gubaxežintan."


²⁰ Nenduwg gadinh, "Sizi, ?eşqi nesdlin danh nexwanits'egughenilah ?eguh lha gwa ?ananantezest'anx."

²¹ Sizi yunt'in jid yenaghilh?in hink'an gayelhnih, "Nenduwg chuh gataghanilh. Didagats'i hint'in ?eyi bi?ughinqid hink'an deni ?etijel?in ?eyen gutuwg xaghunish. ?Eguh hink'an gudish nench'ez gwetah gwetaghant'inlh. ?Eguh ganenjagh hink'an sech'ih teghunya."

²² Guyen deni ?eyen gwedežts'an belh lha gut'in jinaghel?in. Gwetah gulyuž gwaneş bedzi denidah gwanatisdzah.

²³ Sizi ?eguh yetaghi?in hink'an guyen jeyelhnadilh ?eyen guts'en gadinh, "Gwetah jegulyuž ?eyen gudish nench'ez nendajetayalh ?eyed guts'en gwagwelnah hajint'ish."

²⁴ Guyen jeyelhnadilh ?eyen, nenduwg xugubelhnih ?eguh lha gwanijilil. Gan shunchuwg gagubelhnih, "Gudish nench'ez ?egun gwagwelnah jid nendats'eyash. ²⁵ Guyen deni seneya jelyuž ?eyen Gudish nench'ez nendajetayalh ?eyed, guyi nulh camel ?eyi gu?en jid gwagwel?iny ?aghanginshnagh gughatayalh han."



Nulh camel ts'edinh.

²⁶ Guyen jeyelnadilh ?eyen ?inlhes gu?en jid lha gwanijilil hink'an ?elhts'en gajedinh, "?Eguh lha jid gudish nench'ez nendats'uya guyah telagunt'ih?"

²⁷ Sizi gubenaghilh?in hink'an gadinh, "Deni jadint'ah ?inlhes gubets'en gwagwelnah hagunt'ish gan Gudinits'il?in belh ?eguh lha gagut'ish. Gudinits'il?in belh ?eguh lha did t'ats'enentašdalh."

Sizi nelanaghetadinsh gwayalhtig.

²⁸ Peter nenduwgh gayelnhnih, "Xun ?eguh didagats'i hit'in ch'anidil hink'an nenentežidil."

²⁹ Sizi nenduwgh gadinh, "Ts'idaneš jid ganexwelhusni, ganendan ?eyen sid sech'ez belh Gudinits'il?in bejeni bech'ez, gwa becheliqi, k'es bediziqi, k'es beban, k'es beta, k'es bešqiqi guch'aniyah, k'es bequngh belh benen gwech'aniyah. ³⁰ Nendan gajagh ?eyen ?inlhed hunded gwe?anz jid belaghetanish, becheliqi, bediziqi, beban, bešqiqi lajint'ih belanats'etalilh, benen hink'an bequngh lagunt'ih belanagwetaltš'elh. Hink'an nenduwgh chuh gats'etašinlh, lha ts'utašt'in, jinats'anelhtanx, bants'etedlux jid bantats'edidiny, jinats'anelhtanx gughalanz gagulhnaž gudish nench'ez selhdenitalilh.

³¹ Gan jalan ?ech'an jinlin ?eyen ?ech'ilh?ah jetalilh han hink'an ?ech'ilh?ah ?eyen ?ech'an jetalilh han."

Sizi shunchuw h k'adex xuts'etalh?inlh ?eguh gwayalhtig.

³² Sizi guch'an ghelgish, Jerusalem gwets'en ?eten jeghanalh, guyen jeyelhnadilh ?eyen lha gwanijilil. Jalan guch'ih jadelh ?eyen yajeniljud. Hink'an shunchuw h guyen jeyelhnadilh ?eyen jalan ?eyen guba?eyud nigubenilah hink'an nenduw h xuts'etalh?inlh ?eguh gagubelhdetižni. ³³ Nenduw h gagubelhnih, "Jerusalem nidil ?egun Deni gudes xaghinyah ?eyen, yašalhtig ?aghendes belh Deni ?ijegwedelh?anx ?eyen gutl'ats'etalhtilh, ?eyed hink'an ch'ats'edulax gweqa banits'egugheta?alh hink'an ?ets'en deni tl'ats'etalhtilh. ³⁴ ?Eyen jeyantadlux, ts'uts'edetažex, jeyutalhtšes hink'an ch'ajeyedetalilh. Tad dzin ghili ch'iz nagutadinh."

Deni gudes xaghinyah ?eyen lha benadats'etašt'in gweqa nenjan hiyal.

³⁵ Hink'an guyen James belh John, ?elhchel Zebedee beyiqi ?eyen, Sizi jeyets'eni?az hink'an gajeyelhnih, "Sizi, nendid gweqa nudaghilqed ?eguh nexwedu?aghunax jid nužit'in."

³⁶ "Nexwaxutasnilh jid šužeht'in?" nih gubudilhqed.

³⁷ Nenduw h gajeyelhnih, "Gudish nench'ez ?egun ?inlhanx nench'ež ?instl'ans tetadalh hink'an ?inlhanx nench'ež nalhes tetadalh. ?Eguh ganexughunlax gužit'in."

³⁸ Sizi nenduw h gagubelhnih, "Lha dideqa ?udelhqed ?eguh ?egweyenehšen hadehnih. Gugun tasalh ?egun xun chuh tah?as xedeyenehdžen teladehnih? Bidaqash bid tasdinlh gwelagunt'ih ?eyi tahdinlh xedeyenehdžen teladehnih? K'es tubi?asets'etalilh gwelagunt'ih ?eyi bid tubi?anexwets'etalilh xedeyenehdžen teladehnih?" Jinanentatanx gwa yalhtig hadaghini.

³⁹ Gajeyelhnih, "Xulht'i lha gasughudanx!"

Hink'an Sizi nenduw h gagubelhni,
 "Gweqehsalh ?egun xun chuh gweqehah?es hink'an
 tubi?asets'etalilh ?eyi bid tubi?anexwets'etalilh, xulht'i
 lha gašuhnax! ⁴⁰ Gan ?inlhanx sech'ež ?instl'ans
 hink'an senalhes tetahqilh ?eguh lha gwa?anadezesni
 has. Guyen guba?ats'egunlagh ?eyen guba?agunt'ih
 hagunt'ish."

⁴¹ Guyen jeyelhnadilh ?eyun, James belh John,
 gajedinh ?ejudilhqed gweqa guts'en yajaghenilch'agh.
⁴² Hink'an Sizi gats'in guqajaghini, hink'an nenduw h
 gagubelhni, "Nenduw h nenqay king, deni gha
 nijegughenilah, ?eyed gwech'ih deni gha
 ?anajedetanih hajint'ish. King bedeni ?eyen
 gajetat'inlh. ⁴³ Gan xun xwets'en ?eguh lha gagut'ih.
 Nexwetex ganendan yadi weli gušt'in ?eyen
 xwenadata'in. ⁴⁴ Hink'an nendan su ?ech'an weli
 gušt'in ?eyen gats'in guba ?elhna talilh hagunt'ih.
⁴⁵ Deni gudes xaghinyah ?eyen xeded hinchuh lha
 banadats'etašt'in gweqa nenjan hiyal, gan
 nexwenadata'in hink'an deni ?ananajenentat'insh
 ?eyed gweqa ch'adetanih jid gwech'ixetalhtsilh han."²⁰

Sizi, lha gwaš?in ?eyen nayetilh?iz.

⁴⁶ Ch'iz gugun qwentex Jericho ts'egwedinh ?egun
 jenindil, ch'iz Sizi jeyelhnadilh belh deni lhan ?eyen
 qwentex Jericho jixajetiždil. ?Egu deni lha gwaš?in,
 Bartimaeus ts'edinh, Timaeus beyi, ?eyen ?eten
 gwalhch'ež šedah ?udedzish jeyeghex gughajaghenalh.
⁴⁷ Sizi Nazareth gwet'in gheyalh gwedežts'an belh
 nenduw h gadinh yets'en jetižnish, "Sizi, David
 bets'enz xaghinžed, saya?anaghundanx."

⁴⁸ Deni lhan "Tadindiny!" jeyelhnih.

?Eguh chuh ?elhch'iz nenduw h gadinh jenish,
 "Sizi, David bets'enz xaghinžed, saya?anaghundanx."

²⁰ 10:45 ?Inlhi tah ch'ilhgha gwech'ih xa ?elhtsin Sizi deni welhy ish qa
 ch'ats'edinlagh.


⁴⁹ Sizi nininyah hink'an nenduwh gadinh,
"Beqajehnish."

[?]Eyed hink'an deni lha gwaš'in bets'en nenduwh gajedinh jid jeyeqajaghinish, "Nidinyash. Guzun jid gwadanighunzed. Nenqajenish hadinh." ⁵⁰ ?Ech'ed yišedah ?eyi xayaghi?ed. Niditled hink'an Sizi yeghen nininyah.

⁵¹ Hink'an Sizi gayelhnih, "Naxutasnilh jid šuzint'in?"

Deni lha gwaš'in, nenduwh gayelhnih, "Sizi²¹, natust'is guzest'in."

⁵² Sizi gayelhnih, "Nenk'ed ghinlgish. set'ayenintan gwech'ez sa?ananenjagh." Nenk'eguh danh natist'iz, nenk'egun deni lhan belh Sizi yech'ih gwech'algay.




Nen Judea ts'egwedinh.

²¹ 10:51 Sizi Si ?igwedilh?anx jid ts'uzin.

11

Sizi Jerusalem gwet'in nendajeyunyah.

¹ Sizi jeyelhnadilh belh Jerusalem gwets'en jeghanalh. Bethphage qwentex hink'an Bethany qwentex gughen dilhgwenlh ch'ed olive chen gulin ?eyed, nandih yelhna?as ?eyen guch'an gwetl'agubeghinlah. ² Nenduw h gagubelhnih, "Nexwech'az qwentex guntsel ?eyed, k'an dzanh qwentex neh?az, donkey lha ?inlhed binats'e sex, jixetl'un talhtsax. ?Eyi betl'ulh ch'edah?ed k'an ?egwenz tulhush. ³ Deni ?inlhanx tah, 'Xunlht'in haht'in?' nexwelhnih hink'ed nenduw h galhuhni, 'Nexwa?anadeni yutat'in, lha sex hilih ?egwenz nexwets'en gwetl'anayulhtilh.'"



Nulh donkey ts'edinh.

⁴ ?Egu ?egun jeni?az. Donkey ya?anxw gweqwedeten gughen jixetl'un jinlhtsan, hink'an k'an

dzanh tl'ulh ch'ejedetiž?ed. ⁵ ?Egu deni belhdan gughex najedilhyah ?eyen nenduwg gajedinh, "Nendideqa donkey betl'ul ch'edetežeh?ed?"



Nendideqa donkey jetilhchud gweqa guts'udilhqed.

⁶ Sizi gagubelhnih ?eguh gajedinh gwech'ez gubits'edalghel. ⁷ ?Egu Sizi bets'en donkey najeniluy. Ts'ed xadijedits'enz ?eyi jeyech'ilah hink'an Sizi yech'itl'adidah. ⁸ Deni lhan guts'ed xadijedits'enz ?eyi ?eten tayalh ?eguh gujeyedaghilah. Hink'an belhdan ?elgan xadajelht'as ?eyi ?eten nijedaghili. ⁹ Deni belhdan bech'an xanalh hink'an belhdan bech'ih xanalh gats'in nenduwg gajedinh jejaghinish, "Nanidiny nenjan ninyah. Gudinits'il?in bedata?anant'in gwech'ez ?egwenz xaghinyah, ?eyen dežilti. ¹⁰ ?Undidanh David ghinli bets'enz xaghidžed.

David ?eyen gwa?anadižni gagughint'i shunchuw h ganagwetadinlh. Su ?ech'a yadi jid gwedežilti." ¹¹ Sizi Jerusalem niyah hink'an Gudinit's'il?in bequngh gughen chets'aghedilh gwa?agunt'ish ?egun jiz gughelgay. Gagulhchugh nase?iz. Gwetized chu?agujagh gwech'ez guyen jeyelhnadilh ?eyen belh Bethany gwets'en gunajadil.

Sizi fig chen belh yalhtig.

¹² ?Egwilhqan Bethany gwech'anajendil, Sizi bechangužun. ¹³ Nižaž fig chen bet'an gulin hinlhtsan. Nižt'an talhtsax yenizen ?egun helgay. Fig nižt'an ba gwetalax lha gwanagwešid gwech'ez ?et'an dzan h hinlhtsan. ¹⁴ "Lha gwech'iz nanižt'an nats'etašdinlh" nih, fig chen belh yaghinlhtig. Guyen Sizi jeyelhnadilh ?eyen jeyužaghilhts'an.

Sizi deni ?ejene?insh gubelhnih ?eyen tidagubenizud.

¹⁵ Shunchuw h Jerusalem gunajadil. Hink'an Gudinit's'il?in bequngh gughen chets'aghedilh gwa?agunt'ish ?egun jiz gughelgay, ?egun guyen gwetuwh jejuqid hink'an gwetuwh jejuqid ?eyen tidagubenizud. Guyen seneya ?elhch'ixejenentedzih ?eyen guch'edan dish nadaghilhqig. Guyen nulh lhek'el bejuqid ?eyen guch'edešdagh dish nadaghilhqig.



Gudinit's'il?in bequngh gughen nulh lhek'el bets'uqid.

¹⁶ Hink'an lha gwech'iz gugun Gudinit's'il'in bequngh gughen chets'aghedilh gwa'agunt'ish ?egun lha gwetuwh ?inluwh chuh gughanajušlilh gubelhnih. ¹⁷ Hink'an nenduwh gadinh ?igubedetilh'in, "Nenduwh gagwedinh Gudinit's'il'in bedestl'es ch'ed gwež'an: 'Sequngh deni gats'in guqa xents'agult'i qungh hagunt'ih,' gan deni ?ejene'insh ?eyen guqa gwež'an gwezelhtsin! Nexwets'ughutan ch'a xents'agult'i qungh gughen gah'in!"

¹⁸ Xughelt'in hink'an xudalni ?eguh deni lhan lha gwanijilil, yašalhtig ?aghendes belh Deni ?ijegwedelh'anx ?eyen jjegwedilhyan gwech'ez jeyiniljud. ?Eguh gwech'ez ?inluwh tah jid ch'ajeyedulax gweqa jeguwetiž'an.

Sizi xents'agult'i gwayalhtig.

¹⁹ Sizi belh jeyelhnadilh, xelhyiz qwentex jixanajadil.

²⁰ ?Aben ?eguh jeghanalh ?egu fig chen ghananajadil, ?eyi galhchugh disez šelin. ²¹ Peter gwech'inanighedžed hink'an nenduwh gadinh, "Sizi²², gweninh'in. Guyi fig chen belh yaghinlhtig ?eyi disez šelin."

²² Sizi nenduwh gagubelhnih, "Gudinit's'il'in bet'ayenehtan helhish. ²³ ?Alh'adesnish, Deni ?inlhanx tah nendid dilhgwenlh, 'Taxedintšid,' nih, dilhgwenlh belh yaghinlhtig, bedzi bid lha gwets'udidlan chu'ant'ish hink'ed. ?Inlhes gagwetanilh jid gwet'ayenetan hink'ed, bagagwetanilh han. ²⁴ ?Eguh gwaneš ganexwelhesnih, Gan nendideqa xents'agulht'ih, yedanx helhchud jid gudehdlan hink'ed, talhcholh han. ²⁵ Ganendan xents'agulht'ih hink'ed, deni ?inlhanx yets'en nentsen ?eyen yets'en naghedzun hink'ed, ?eyen yets'en suninagweta'alh.

²² 11:21 Sizi Si ?igwedilh'anx jid ts'uzin.

ʔEguh gajagh hink'ed nexweta yudish sedah ʔeyen chuh yets'en suninagwetaʔalh han. ²⁶ Gan lha denits'en suninagwehʔal hink'ed nexweta gudish sedah ʔeyen chuh lha nexwets'en suninagwetašʔalh."

Sizi betl'ats'egughinʔan gwayalhtig.

²⁷ Shunchuwħ Jerusalem najendil. Hink'an Gudinitš'ilʔin bequngh gughen chets'aghedilh gwaʔagunt'ish jiz najedilh, ʔegu yašalhtig belhdan belh deni ghaʔanajedeni gant'en jeyenaghindil. ²⁸ Sizi bets'en nenduwħ gajedinħ jeyudilhqed, "Nendan ʔeguh gaghunt'in nelħnih hanent'in k'es nendan nenduwħ gataghant'inħ nentl'axgugħiʔan hanent'in?"

²⁹ Sizi gagubelħnih, "ʔInħitah qa nexudetašqed, gaselhdahnih ʔeguh hink'an ʔeguh gast'in ʔeguh nents'enz setl'ats'egugħiʔan ganexwelhdetasnilħ.

³⁰ John deni tubiʔalhʔinsh, Gudinitš'ilʔin bets'enz telagħet'in k'es denitš'enz telagħet'in? ʔEguh gaselhdehnih!"

³¹ ʔElhelħ gwanayajaltig, "Gudinitš'ilʔin bets'enz didinħ hink'ed nenduwħ gadinħ nexudetalħqed, 'Dideqa lha xudehdlanl?' ³² Gan Denitš'enz didinħ hink'ed..." (Gatš'in John ʔinħes Gudinitš'ilʔin bets'enz hagħet'in jegudidlan gwech'ez deni lħan ʔijenilħjud.) ³³ Nenduwħ gajedinħ, "Lħa ʔegweyenidžen."

Sizi nenduwħ gagubelħnih, "Sid chuh ʔeguh gast'in ʔeguh nents'enz setl'ats'egugħiʔan lħa ganexwelhdetezasnilħ."

12

Sizi nagweding bech'inits'ezig gant'i bid xedanagwelning.

¹ Sizi nagweding bech'inits'ezig gant'i bid gubelh nagwetilhnig, "Deni ?inlhanx nižt'an chen gunachen daghilah hink'an gwenenižt'l'un. Nižt'an ts'enelhjenž gwa?agunt'ish gweqa nen xagughilah. Yadish tets'eyash ?elhanx ts'eyetiž'in gwa?agunt'ish ?agunlagh. Did xanaghilhyan belhdan ch'ilhgha nen deni gubagwelh'an, hink'an nižaž gughiyah. ² Nižt'an ch'inint'an hink'an nižt'an belhdan guts'en nawelchud gweqa ?elhna ?inlhanx ?egun guts'en gwet'aghilhtin. ³ ?Eyen tejayaghelchud hink'an ?ananajeyešdlin. Lha did chuh naxalhnih jeyinadalghel. ⁴ Guyen bets'enz gulin ?eyen shunchuw h ?elhna ?eyun guts'en gwet'aghilhtin, ?eyen k'es jeyets'enilht'i. Hink'an lha ?egun hilih jid jeyets'en ?anaješt'in. ⁵ Bets'enz gulin ?eyen shunchuw h ?eyun ?inlhanx guts'en gwet'aghilhtin. ?Eyen ch'ajeyedilagh. ?Eyed ga'in, ?eyun guts'en gwet'ahelhtish. Deni lha?alhad ch'aguts'edilagh, belhdan ?ananaguts'adlish.

⁶ " ?Inlhanx dzan h gwet'atalhtilh gulin. Beyi xunt'in ?eyen su ?ech'ilh?ah gwet'ayaghinlhtin. Nenduw h gadinh, " ?Inlhes yadi jid jeyadanitazed hant'ish; ?inlhes jeyedetalhti hant'ish."

⁷ "Guyen nižt'an xajenelhyax ?eyen nenduw h ga?elhelhjededinh, " ?Eyen k'adex nen betl'anagughetalt's'elh hant'ih. Ch'adilyagh ?eguh, xun xwet'anagults'id." ⁸ Tejayaghelchud hink'an ch'ajeyedilagh. Nižt'an gweneništ'l'un ?eyed jixajeyaghilht'i.

⁹ "Guyen benen ?eyen xutalnih? Nižt'an xajenelhyax ?eyen guts'en niyah hink'an ch'agubedetalilh. Hink'an nižt'an belhdan ch'ilhgha, nen deni ?eyun ghagwetalh?alh. ¹⁰ Gudinit's'il'in bejeni nenduw h gagwedinh gwech'edets'ezjez lha

gwech'eyašelhtig tesaneht'i, 'Guyi tsi lha xuht'in ?eyi hah su bet'ad Gudinit's'il?in tsi ?elhch'idenaghindzay.

¹¹ Gudinit's'il?in ?agunlagh hagunt'ih. Jitidat'in."


¹² Nenduw h xuldinh ?eguh gubayalhtig hadaghini ?eguh ?egwejeyenižen gwech'ez ?inlhetah jid nendajeyuwelht'ax jegušt'in gan deni lhan ?ijenilhjud gwech'ez gwanajetišdil.

Sizi ?ets'en ?aduni qa?ats'elh?in.

¹³ Guyen Pharisee hink'an Herod gubixudinten belhdan Sizi bets'en gwetl'aguts'eghinlah. ?Inlhetah jid gwaghex ?adin h tejejewelchud jeyenižen.

¹⁴ Jeyets'enindil hink'an nenduw h gajedinh, "Sizi ?alh?adin h ?egweyenidžen. Lha deni ?inlhanx bets'en z nidežintl ad gan Gudinit's'il?in bech'ih tš'idaneš jid ?igwedinh?anx. Caesar bets'en taks ch'ixa?iltsish ?eyi, ?egun k'es lha ?egun hilih tesat'in?

¹⁵ Taks ch'ixeteghaltsilh k'es lha gatežaghadin h tesanh?"



Sizi ?ets'en ?aduni qa?ats'elh?in.

Sizi ?ets'en ?aduni qa?ajeyelh?in ?eguh chuh gubelh ?egweyenižin gwech'ez gagubelhnih, "Dideqa ?ets'en

jitasulhtilh qa?ahť'in? Seneya ?inlhi sets'en nah?alh,
?eyi nuwes?in."



Seneya Caesar betsi ch'idaltsin.

¹⁶ Seneya ?inlhi jeyets'enin?an. Hink'an Sizi gagubelhni, "Bech'ed nendan betsi ch'idaltsin, nendan beghuzi bidi?an hant'ih?"

"Caesar hant'ih," jedinh.

¹⁷ Sizi gagubelhni, "Nendid Caesar beghuzi bidi?an ?eyi Caesar betl'anuh?alh, hink'an nendid Gudinit's'il?in bets'enz ?eyi Gudinit's'il?in betl'axulhnish." ?Eguh gadinh gwa ?inlhes lha jeyanilil.

Sadducee chuh Sizi jeyudilhqed.

¹⁸ Hink'an guyen Sadducee gulhts'edinh, ch'ats'edet'insh ch'iz lha ninats'edesdash jegudidlan ?eyen belhdan jeyudilhqed jeyenižen gweqa jeyets'enindil. ¹⁹ "Sizi, Moses nexwadest'es ?alagh bech'ed gagwedinh. Lha ?eşqi ješt'anx danh ts'iqi beqen ch'adejagh hink'ed, ch'adejagh ?eyen bechel yech'ih ghezelh ?eyen ya ?eşqi ?atalilh gwech'ez bunagh beşandinlh belh bitu?anatadinlh jid gwets'enz. ²⁰ Nenduw h gagujagh, ?inlhed ch'ilhghilh ganilt'ih jelt'ih, ?elhcheliqi jinlin su ?ech'an ghezelh tubi?ajagh hink'an lha ?eşqi hit'inl chu ch'adejagh. ²¹ ?Eyen yech'ih ghezelh yeşandinlh belh tubi?anajagh, ?eyen chuh lha ?eşqi hešt'anx chu ch'adejagh. Shunchuw h bechel ?inlhanx su gajagh. ²² Gats'in ?elhgha?en lha ?eşqax jit'inl chu ch'ayajedijagh. ?Ech'ilh?ah şandinlh ?eyen chuh ch'adejagh. ²³ ?Eguh nenduw h xugwetalht'ilh? Gats'in jeyelhtubi?aghint'i ninajedidil ch'iz nendan be?ad talilh han?"

²⁴ Sizi gagubelhni, "Gudinits'il'in bejeni jidats'egwedinh k'es Gudinits'il'in benadint'i ?eyed lha su ?egweyenešen ?eguh gwech'ez ?ets'en jid gwadanişed teladehni?" ²⁵ Deni gats'in ch'ajedejagh ch'iz ninajedidil, ?eguh lha tubi?ajit'ish hagwetat'ilh, gan gangu ližans gajint'ish jetalax hajint'ish.

²⁶ Ch'ats'edet'insh hink'an ninats'edidilh jidagwedinh. Lha ?eyed gwech'eyaşelhtig telaneht'ih?²³ Moses destl'es ch'ed, xwests'el dižk'en hinlhtşan ?eyed gweyi Gudinits'il'in nenduw ghayelhni, 'Sid Abraham beGudinits'il'in hast'ih. Isaac chuh beGudinits'il'in hast'ih hink'an Jacob beGudinits'il'in hast'ih.'²⁴ ²⁷ Gunchagh jid ?ets'en hadehni, Gudinits'il'in ?eyen lha ch'ajedejagh ?eyen gubenits'il'in hilih han, gan guyen jegwenish ?eyen gubenits'il'in hant'ih." (Ch'ats'edejagh ch'iz chuh denits'etalilh hagunt'ish.)

Nexwanits'egughenilah nendad su ?ech'a yadi jid badanigwedşed?

²⁸ Deni ?ijegwedelh?anx ?inlhanx niyah ?eyen ?elhelh yajeltig gubedežts'an. Sizi nenduw h xuldinh yužaghinlhtş'an gunt'in gwech'ez yudilhqed, "Beghad deniteghadlilh nexwanits'egughenilah ?eyi nendad su ?ech'a han?"

²⁹ Sizi nenduw h gadinh, "Su ?ech'a hink'an ?ech'an nexwanits'egughenilah: 'Israel gwet'in, ?užuwelhtş'an. Gudinits'il'in ?inlhanx gulin ?eyen nexwa?anadeni.

³⁰ Gudinits'il'in bets'en, nentsin gats'i bid xuteghant'in.'²⁵ ³¹ ?Eyi gwech'ih ?eyi: 'Deni ganendan ?eyen, xedunint'in ?eguh gagunt'ih jid

²³ 12:26 K'es teladehni.

²⁴ 12:26 Deni Jacob ts'edaghini ?eyen yedanx danh (diny hundred xi gu?en) Moses yech'an denighinli. Jacob beta Isaac ts'edaghini belh be?intsi Abraham ts'edaghini.

²⁵ 12:30 Nenduw h su gagwedinh, Gudinits'il'in bets'en nendzi gats'i bid belh nentsin gats'i bid belh nini gats'i bid belh nagwedint'i jid xuteghant'in.

gubuteghant'in.' Nendid nanqih ?eyi gwelan nexwanits'egughenilah ?eyi bech'an hant'ish," yelhnih.

³² Guyen Deni ?ijegwedelh?anx ?inlhanx gayelhnih, "Alh?adinih, Sizi; Gudinit's'il?in ?inlhanx dzanh gulin, lha ?eyun gulih. ³³ Hink'an neneš ganlhchugh bid xuteghant'in²⁶ hink'an deni ganendan ?eyen xedunint'in ?eguh gagunt'ih jid gubuteghant'in; Gudinit's'il?in bets'en gwetah ts'egwedelhk'ansh hink'an Gudinit's'il?in bets'en nulh ch'ats'edelh?insh ?eyed gwech'a yadi jid gwadanigwedzed."

³⁴ Sizi guzun ?ats'edinj jid gwech'ighanišesed hink'an gayelhnih, "Eguh gadinih ?eguh gughen tsel jid Gudinit's'il?in xutaghanlt'inlh ?eguh ?egweyeninžen." ?Eyed gu?en lha ?inlhanx yudulhqed ?anil.

Sizi xedanagwelniğ.

³⁵ Sizi Gudinit's'il?in bequngh ?anz deni ?igwedelh?anx nenduwj gadinj, "Xulht'i hajedenish guyen Deni ?ijegwedelh?anx ?eyen nenduwj gajedinj ?eguh, Gudinit's'il?in bets'enz xaghinyah ?eyen David yets'enz xaghinzed? ³⁶ David xeded, Gudinit's'il?in yedanagwelniğ, nenduwj gadinj, 'Gudinit's'il?in sa?anadeni ts'en gadinj: "Senalhes texunda.'" ³⁷ David xeded chuh ba?anadeni Gudinit's'il?in bets'enz xaghinyah jid yuzish. David ba?anadeni xugunlht'i jid yets'enz xaghinzed hagwetat'ilh?" Gats'in jeyuzilhts'an gwenajenaghedinj.

Deni ?ijegwedelh?anx gubaxuwehtan.

³⁸ Sizi deni ?igwedelh?anx nenduwj gadinj, "Deni ?ijegwedelh?anx belhdan gubaxuwehtan. Gubets'eduwelhti gweqa ?ets'uqid gwelex ?eguh ts'enz nenaž ?ijedilhts'ih. ³⁹ Chets'aghedilh ?eyed

²⁶ 12:33 Nenduwj su gagwedinh, Hink'an nendzi gat's'i bid belh nini gat's'i bid belh nagwedint'i jid xuteghant'in.

ch'edesdagh dižti ch'ed tejedilhts'ish hink'an
 ?ets'eguvelish ?eyed chuh ts'egwedilhti ?eyed
 tetl'ajedelts'ish. ⁴⁰ Hink'an šandinlh guts'enz
 guch'adajene?ax. Guch'initš'užid ch'a sex deni nalh
 xents'ajegult'ish. Nendan gajet'in ?eyen su ?ech'a
 guntsen jid jinaguts'enentalhtanx hajint'ih."

Sizi seneya jits'enedzish gwenilh'in.

⁴¹ Sizi Gudinitš'il'in bequngh gughen seneya
 jits'enedzish ?eyed gwech'az nitr'adindah hink'an
 xulht'i jid seneya jits'enedzish gwenilh'in. Guyen
 gwetah jegulyuž ?eyen seneya lhan xajenedzish.
⁴² ?Egu guyen šandinlh ?etil'in ?eyen ?inlhi send dzanh
 ch'ih gwežtan, jinaghilhguy.

⁴³ Jeyelhnadilh ?eyen ts'en gubenentaltsig jid
 guqajaghini hink'an gagubelhni, "Ts'idaneš jid
 ganexwelhusni, nenden šandinlh ?etil'in ?eyen gats'in
 xejenaghindzay ?elhinagudati gwagu?en jid
 xenaghin?an hajagh. ⁴⁴ Guyen gwetah jegulyuž ?eyen
 guzeneya belhdan dzanh xajenaghindzay, gan xeded
 ?eguh yet'ad denitalilh ?eyi gats'i xayenaghin?an
 hajagh."



Seneya jits'enelhwish.



Sandinlh seneya jinaghilhguy.

13

K'adex ?etits'etal?inlh.

¹ Sizi Gudinit's'il?in bequngh ?anz tinagheadalh ?egu, guyen jeyelhnadilh ?inlhanx gayelhnih, "Sizi, gweninlh?in, qungh gagusun, tsi chugh bech'ede?elhtsin ?elhch'its'edenaghindzay." ² Sizi nenduwgh gayelhnih, "Qungh gagusun gwenilh?in. Nanats'egwedenentaggen's hagunt'ih, lha tsi ?inlhi ?elhch'ed ?elhqadenenta's?alh hagunt'ih."

³ Sizi Gudinit's'il?in bequngh gwagunez dilhgwenlh olive ni'zt'an xanelhyish ?eyed gwenen sedah ?egu Peter belh James belh John belh Andrew jadint'ah jeyeghen nijagheninan hink'an jeyudetilhqed: ⁴ "Xugulhyad gagwetanih xungh? Gagwetanih gwets'en gwa'zelh, xugunlht'i jid ?egweyentaghadzanx?"

⁵ Sizi gagubelhdeti'zni, "Lha ?inlhanx nanexwene's?ax. ⁶ Jalan ?eyen "Gudinit's'il?in bet's'enz xaghinyah hast'in," jedinh, deni lhan ?ets'en jenenta?ex. ⁷ Nexweghex ?elhts'ult'ax gwede'zeht's'an, hink'an nen niza'z ?elhts'ult'ax jigwedelhyan hink'ed lha naxenenta'zehdilh. Nenk'ed gagwetanih gan lha nenqay ch'agwedeta'snilh. ⁸ Nen ?elhch'an ninats'edindil hink'an nenqay nen gunchagh ?elhch'an ninats'edindil hink'an ?elhts'utalt'ex. Niyatah nen chuh nagughetadanlh. Dan yats'etalax. ?Egu su ?ech'an jinats'enentatanx, gangu ts'iqi ?esqi ghet'inlh bech'inlhts'ad, ?elhgha?en ?esdan ?elhghen bech'inalts'ig gagweta'ilh.

⁹ "Gan xedaxetahtinlh; deniqa najegugheta?alh ?etex xaguts'aghinlah ?eyen gubed ninanexwets'etalhdilh, hink'an chets'aghedilh qungh ?eyed dechen bid nexwech'edats'edetailt'i, tse's bid nexwech'edats'edetailt'se's. Sudihdlan gwech'ez hink'an

sayawelhtig gweqa nen guntsel gwa?anajedeni ?eyen belh nen gagulhchugh gwa?anajedeni gubenadas nadetalhyalh. ¹⁰ Gudinit's'il?in bets'enz ?alh?agwedinh ?eyi deni gats'in ts'en gubits'egughilhni hink'an ganexwets'etalh?inlh. ¹¹ Ganendin qungh nenchagh nendanexwets'enilht'i hink'an qod nents'udetalhqed jid nanents'aghetaten. Xudetalhnilh ?eyed gwech'an lha gwanaxenentezindash, gwanagughized k'an ?inlhetah ?adetahnilh ?eyed, Gudinit's'il?in xudetalhnilh ?eguh nelh ?atanilh, lha nin hilih yataghanlhtig hagwetat'ilh gan Gudinit's'il?in ba yataghanlhtig ?eguh jid ni?anata'in.

¹²⁻¹³ "Hink'an sid sech'ez deni gats'in gunchagh jid lha nexwejutašt'in gwech'ez nenduwch chuh gats'etat'ilh, deni ?inlhanx bechel ch'ats'edulax gweqa yagwetalnig hink'an ?inlhanx bešqi ts'en chuh ?eguh jid ?anata'in. Hink'an ?ešqax guta belh guban, gubedešniqi ch'aguts'edulax gweqa ?elhch'aninajedetadelh. Ganendan ?ech'ilh?ah gwets'en sech'ez nalt'i ?eyen detajish. ?Eyen gudish nench'ez ?agwetalilh.

¹⁴ "Guyi gunchagh jid nentsen gwech'ez jigwenijed lha bets'enz gulih ?eyed nadetal?alh, nendan ?ech'eyalhtig ?eyen sul ?egweyenužin, guyen nen Judea jedilhts'ish ?eyen dilhgwenlh ts'en tsijaghetulnalh.

¹⁵ Ganendan bench'ed tenayah ?eyen lha guyax qungh gwetuwh tinagughetalhnish gweqa ?egun nanawešja.

¹⁶ Nendan yaneš tl'ech'ed ?ana'in ?eyen lha ch'ih bekud natalhcholh gweqa ?egun nanawešja. ¹⁷ Jalchan

?eyen hink'an ?ešqax jintsel jet'in ?eyen gundaž jid ?etijetal?inlh. ¹⁸ Lha xi hagusnax gweqa xents'anaguwelht'i. ¹⁹ Gudinit's'il?in nenqay ?agunlagh gudin lha gagulhtsen nats'egwenentalh?inlh, ?eguh gagwetanilh hink'an ?eyed gu?en lha gwech'ih gagulhtsen ts'egwenentalh?inlh. ²⁰ ?Etex

xaguts'aghinlah ?eyen sex jinajenetanx gwech'ez Gudinit's'il?in guba nagughedetalht'ex, lha ganil

hink'ed ch'elejetagganlh, lha ?inlhanx detašjish.

²¹ Gagwet'in gughad ?inlhanx tah ganexwelhnih, 'Nenden Gudinit's'il?in bets'enz xaghinyah hat'in, ninlh?in!' k'es 'Eyun ?eyen neyad hant'ih, ninlh?in!' jedinh hink'ed lha gubudihdlan. ²² Gudinit's'il?in bets'enz xaghinyah jaghedil?in belh Gudinit's'il?in jeyedanagwelnig jaghedil?in hink'an nagwedint'i jid ?inlhetah lha gwanit's'esdlax ?ajetanilh, ?eyed gwech'ez lha gubanit's'ilil ?eguh jid Gudinit's'il?in ?etex xagubaghinlah ?ets'en jenentu?ax qa?ajetat'inlh.

²³ Gubaxuwehtan; ?eyed gweqa gwech'an danh ganexwelhesnih.

²⁴ "Eguh hink'an gundaž jid ?etits'al?in ch'iz 'sa lha tidish hink'an ?aldzi lha bets'enz xayidish talax.

²⁵ Hink'an šen yat'ax xadanentažed, hink'an yat'ax nagwedint'i jid naguwetadanlh.' ²⁶ ?Eguh hink'an Deni gudes xaghinyah, benadint'i belh bets'enz xaghindin, qw'es tuwh gudin gheyalh ts'etalhtsax. ²⁷ Hink'an ližanš, nenqay gagulhchugh ?etex xaguts'aghinlah ?eyen, nacheguts'aghetalilh gweqa gwetl'agubetalilh.

²⁸ "Guyi tl'asbay beghad ?igwedulh?anx, bedechen beghež gwežlin, bet'an ?igwediltšan, dan gwets'en gwaželh. ²⁹ ?Eguh gagunt'ih jid nexwenalh nenduw h gwayaghilhtig ?eguh gagwetist'in, nenqay ch'agwedetanilh gughen tsel gwanagughized ?eguh gagunt'ih jid ?egweyenentahšinh. ³⁰ Ts'idaneš jid ganexwelhusni, Nenjan k'an deni jilin ?eyen lha gats'in ch'ajedešnax gwe?in danh gagwetanilh.

³¹ Yat'ax belh nenqay lha gul talax, gan sejeni ?eyi lha gatašnilh.

³² "Gan lha ?inlhanx ?eyed dzin k'es ?eguh neghalt'i ?egweyentašanx, gudish ližanš ?eyen chuh, sid beyi nesdlin lha ?egweyenešen, seta dzanh ?egweyenižen han. ³³ Sul gwaxežehtan jid ch'eyeteweht'in! Lha ?eyed neghalt'i gwaguyah. ?Eyed neghalt'i lha ?egweyentažahšinh. ³⁴ Gangu deni ?inlhanx nižaž gwedenentadalh gagunt'ish. Bequngh gwech'atayalh,

be²elhna jinlin ²eyen gwajughuwetan qa²agubilagh. ²Elhagh²eyuw^h ²anajetat'in nigubeghilish. Nendeten gwaxižtan ²eyen gayelhnih, 'Gagulhnaž gwaxughuntan!'"

³⁵ Sizi gagubelhnih, "Lha xugulhyad bequngh ²anatadalh ²egweyenehšen gwech'ez gagulhnaž ch'eyetuwaht'in. Xelhyiz k'es, naghinlhghil k'es, težniž gu²en k'es, yelhqan tesatanilh. ³⁶ Lha xentsel nenchax nananatašdalh. ³⁷ ²Eguh xun ganexwelhesnih, Gwaxuwehtan! Deni gats'in guqa hadesnih, 'Ch'eyetuwaht'in!'"

14

Tš'iqi Sizi ch'idenlh bi²ayinlagh.

¹ Nad dzin ghili hink'an gunchagh dzin Passover ts'egwedinh, lhiz lha nilžux šet'ish ts'eyinsh gweqa chets'aghedilh gwets'en gwaželh. Yašalhtig ²aghendes jinlin belh Deni ²ijegwedelh²anx ²eyen nagwenet'in y jid Sizi jeyelhghil hink'an ch'ajyedulax gweqajeguwe²a. ² "Deni lhan nexwetejutsanx ch'a, lha chets'aghedilh gughad hasughudanx," jedinh.

³ Bethany qwentex Simon beneš xadatlax ts'edinh ²eyen, Sizi belh bequngh nejedan ²egu tš'iqi beš nentsel bi²ašdenl bededinldzi alabaster ts'edinh bid ²ats'ilagh, ²eyi ch'idenlh dižti bid gulin ²eyi nendayeninlhtan hink'an yedex xagughinhqed nenk'egun Sizi yetši ch'eyežnel.

⁴ ²Eyed gweqa belhdan yajaghenilch'agh jid ²elhelh gwanayajaltig, "Dideqa nendid ch'idenlh gants'iz šelin? ⁵ Nendid ch'idenlh ²inlhed xi be²ad deni taghanlilh ch'ih gwežtan jid be²ughinqid hink'an deni ²etil'in tuwh xataghanish tesaghint'i ²eyi hayinlagh," jedinh. Hink'an jeyets'udaghinla.

⁶ Gan Sizi gadinh, "Lha bets'udelha hah! Dideqa galhehnih hadehnih? Nenden guzun jid sets'en

ʔanašt'in. ⁷ Deni ʔetijelʔin ʔeyen gagulhnaž nexwelh denijetalilh, ganendin gubelh ʔaʔehnax gužeht'in gatahnilh; gan sid lha gagulhnaž nexwelh denitezasdlilh has. ⁸ Guyen ts'iqi, gaʔenax gušt'in ʔeguh gajagh. Sunisets'etalhtilh gweqa šeneš ch'idenlh bid xenasedelax haghēt'in. ⁹ Ts'idaneš jid ganexwelhusni, Ganents'in nenqay gagulhchugh sanats'egwelnig, nenden ts'iqi nenduw h gajagh binats'ulnish gweqa banats'egwetalnig han."

Judas naguʔeʔa.

¹⁰ ʔElhch'ažnan guʔen nandih ʔinlhanx Judas Iscariot ts'edinh ʔeyen, Sizi yinaʔuduqid yenižen gweqa yašalhtig ʔaghendes guts'en henlgay. ¹¹ Yašalhtig ʔaghendes gubini ʔats'edinh, hink'an seneya betl'ats'enentadzish jegwelhtsin. Sizi yinaʔudetaqelh gweqa, nendin su ʔech'a guzun gatanilh gwech'ighanišed.



Judas Iscariot yašalhtig ʔaghendes belh yalhtig.

Passover ʔajetayinh xenats'egwedelax.

¹² Gunchagh dzin lha lhiz nilžux šet'ish ts'etayinh gweqa chets'aghedilh su ʔech'an dzin Passover

jinats'ulnish gweqa shib yaz ch'ats'edelh'insh.
Jeyelhnadilh ?eyen Sizi jeyudaghilhqed, "Nents'in
Passover ts'eyan teghadinlh gwa xenagwedetaghalyilh
gweqa gwelanexweteghalilh?"

¹³ Jeyelhnadilh nandih
gwetl'agubelih nenduw
gagubelnhih, "Gugun
qwentex naweh?as, deni
?inhanx nusay bes bid tu
nizq'ež ghelhtinh ?eyen
nexweditayalh, ?eyen
nentuht'as. ¹⁴ ?Eyen
nents'in nendaniyah
?eyed guyen bequngh
?eyen galhuhni, 'Sizi
nents'in Passover
belhnadilh gubelh



Beš bitunalten bid tu ts'alhtinh.

netadinlh ?eyed nexwagwež?an gweqa nudilqed?

¹⁵ Gudish ?abesdas ?egun gunchagh gwež?an
nexwigwenentalh?inh, ?eyed ch'edan belh
ch'edešdagh bid xengwedint'ish. Nexwedud ?eyed
ts'eyan xenadulhax," gubelnhih.



?Abesdas qungh gwež?an gubigwenentalh?inh.

¹⁶ ?Eguh hink'an gwech'a jelgay, qwentex jeni?az
hink'an ?eyed xuldinh ?eguh su gagughint'i, jegu?an.
?Eyed Passover ts'eyan xenajedilagh.

Passover gunchagh dzin nejedan.

¹⁷ ?Eguh xelhyiz Sizi belh jeyelhnadilh ?eyed jenindil. ¹⁸ ?Eyed ch'edan k'abah nejedan ?egu Sizi gadinh, "Ts'idaneš ganexwelhdetasnilh, nenjan xun ?inlhanx selhne?edan ?eyen sina?udetaqlh." ¹⁹ ?Eguh gadinh gwech'ez gats'in gudzi denișdagh, ?inlhanx liny, "Sid telatasnilh. Sid xulht'i gawesnax?" jedetižni. ²⁰ Gagubelhni, "?Elhch'ažnan gu?en nandih ?inlhanx hatanilh, selh lhiz ts'ay bitenedelhqig ?eyen hatanilh. ²¹ Deni gudes xaghinyah nexwanatadalh ?egwejid gwech'ede?esjez. Gan Deni gudes xaghinyah ch'azninadinjah ?eyen bets'en gwedints'ad hagwetat'ilh! ?Eyen deni lha hidlanl gu?en jid gwetazulh ghili."

²² Shunk'ah ?ejeyan gwatish lhiz hinlhchud hink'an gudish beta ts'en gwa ch'iqidadiny hink'an ?elhts'idayelhqed, nenk'egun gutexayežni, hink'an gadinh, "Welhchud; wehyan; nendid šeneš hant'ish."

²³ Hink'an bidaqash hinlhchud ?eyi chuh gudish beta ts'en gwa ch'iqidadiny hink'an gubets'en yetižqan, gats'in nentsel jadan. ²⁴ Nenduwh gagubelhni, "Nendid sedel deni lhan guqa sets'enz xatadenlh ?eguh jid ch'adetasnilh, nenk'eguh jid Gudinit's'il?in xuldinh nexwelh nenduwh ninagugheta?alh. ²⁵ Ts'idaneš jid ganexwelhesnih, ?inlhetah dzin Gudinit's'il?in ba gwa?anadetasni gweqa xanatasdalh ?eguh hink'an nižt'an tu nexwelh natasdinlh."

Sizi jeyelhnadilh ?eyen ?elhanx tsixetalnalh gwayaghilhtig.

²⁶ ?Eguh hink'an xents'agult'i shen bijajen ch'iz dilhgwenlh ch'ed olive chen gulin ts'egwedinh ?egun najaghetișdan.

²⁷ Sizi gagubelhni, "Ganexwenilhan sech'atšixetalnalh. Gudinit's'il?in bejeni gwech'ede?esjez gagwedinh, Gudinit's'il?in bejeni nagweding bech'init's'ežig gant'i nenduwh gagwedinh, 'Sid nenguyen shib ghaxižtan ?eyen ch'adetaslilh,

hink'an shib ?elhanx tšixetalnalh.' ²⁸ ?Eguh k'adex ch'asets'edinlagh ch'iz ninadesjah hink'an nen Galilee ts'egwedinh ?egun nexwech'an tasalh," gubelhnih.

²⁹ Peter ?eyen gayelhnih, "Gats'in natsixetilnhan, Sid xulht'i gawesnax!"

³⁰ Sizi gayelhnih, "Tš'idanes jid nin ganalhesnih. Nin ?eguh k'an ?elh?i lusdes lha nad ?adesnih danh tad lha sežaghin?in detaghanilh hanint'ih."

³¹ Gan ?egwechuh Peter gayelhnih, "Xulht'i! Nelh ch'adetasnilh ?eguh chuh gagunt'ih lha ninunentežašinh has." Gats'in chuh su gajedinh.

Gethsemane ts'egwedinh ?eyed Sizi tad xents'agughelt'ih.

³² Gethsemane ts'egwedinh ?eyed gwananajaghadan; hink'an jeyelhnadilh ?eyen gagubelhnih, "Xents'anagust'ish gwets'en nenjan dulhts'i." ³³ Peter belh James belh John ?eyen dzanh xedelh gubetilh?az, ?eyed gundaž jid ?ets'en ninentilhts'ed. ³⁴ Hink'an gagubelhnih, "Ch'adetasnilh jid sedzi denišdagh. Nenjan sech'eyeteweh?in."

³⁵ Gwe?anz nilhdi tsel nininyah ?eyed, guyax digwen taxedetilhts'ed hink'an xents'anagutilht'i, gagunax, "?Eyed neghalt'i sech'an gughetults'id."

³⁶ Hink'an gadinh, "Seta, ganenduwh xuteghanlnilh gužint'in gataghanilh. Gundaž jid jinanestanx ?eyi sanagughetughun?alh, gan lha sid seda?agušnax nin xugulnax gužint'in ?eguh gagunax."



Sizi xents'agult'ih.

³⁷ Gubananaghelgay, belh gubeghighan nagubilt'san. Peter gayelhnih, "Simon, nelhezilhghin hanint'ih hany? Lha jid ?inlhed naghedilht'i gwets'en sech'eyetughu?in guyah telanint'ih? ³⁸ Guntsen ?awe'nax ch'a ch'eyetez'eh't'in, xents'agulht'ih. Nexwetsin ts'idaneš ?anawet'in gunt'in gan nexweneš lha nadit'i."

³⁹ Shunchuw'h xents'agutalt'ilh ?egun gunaghelgay. Xuldinh xents'anagughelt'ih ?eguh ganadedinh.

⁴⁰ Shunchuw'h jeztiz gubananaghelgay. Belh guch'a nadaghint'ish, hink'an lha ?axujeyelhduni guyal.

⁴¹ Shunchuw'h xents'agult'ish ?egwenz xanaghelgay, nenduw'h tad gajagh, hink'an gagubelhnih, "Shunk'ah hanh, sehtiz! Lha nexwanislil! ?Eyed neghalt'i ?eguh gagwetanilh. Sid, Deni gudes xaghinyah nesdlin ?eyen guyen deni gwaghex ta?anajet'in ?eyen gutl'aset's'etalhtilh. ⁴² Ninadahdilh! Nenk'ed ?aghudanx! Gagwetanilh, guyen deni gutl'asetalhtilh ?eyen niyah."

Sizi tets'aghelchud.

⁴³ Nenk'eyed lha najesax danh, guyen ?elhch'ažnan gu?en nandinh jelt'ih ?inlhanx Judas ts'edinh ?eyen deni lhan binlugh chugh belh dechen telt'ish jalilh guts'en gubenilah. Yašalhtig ?aghen des jilin ?eyen belh Deni ?ijegwedelh?anx ?eyen belh t'ajegultin nits'il?in jilin ?eyen ?egwenz gwetl'agubeghinlah gwech'ez hajet'in. ⁴⁴ Hink'an deni ch'aninadinjah ?eyen jighanagubenentalten gadinh, "?Eyed benimešen nentasts'ons ?eyen hata'ilh. ?Eyed welhchud sutsel baxežehtan gwanatulhtilh."

⁴⁵ ?Eyed jenindil nenk'eguh danh Judas ts'edinh ?eyen Sizi yulgay hink'an gadinh, "Sa?anadeni²⁷ nendežilhti," hink'an yenizts'ons. ⁴⁶ Judas

²⁷ 14:45 Sizi Si ?igwedilh?anx jid ts'uzin.

jeyelhnadilh ?eyen Sizi tejezaghelchud hink'an najeyetilhtin.

⁴⁷ Sizi yets'enz ?adedinh ?inlhanx ?eyen binlugh chugh xaghegganž hink'an guyen yašalhtig ?aghendes be?elhna helin ?eyen yeqatilht'i yedzagh xaghilht'až.

⁴⁸ Sizi gagubelhni, "Gangu deni ?ene?insh ts'etalhcholh laht'in binlugh belh dechen talt'ish ghelhilh sets'en nehdi. ⁴⁹ Gwelan Gudinit's'il?in bequngh chets'aghedilh gwa?agunt'ish ?eyed deni ?igwedesh?anx nanaghehdilh ?egwechuh lha selhcholh. Gan yedanx Gudinit's'il?in bets'enz destl'es ?ats'inlagh bech'ed gagwedinh ?eguh gagwetat'ilh." ⁵⁰ Sizi jeyelhnadilh ?eyen gats'in ?elhanx tsijaghetilhnan.

⁵¹ Deni k'anighelilh ?inlhanx ts'enz ts'et'an dižti dzanh ye?ant'ih Sizi yenayalh, ?eyen chuh tets'aghelchud, ⁵² gula tanx tižeh, bets'ed ?iden ?int'id gubatšintilhgay.

Sizi nits'il?in neš naghinžed.

⁵³ Sizi yašalhtig ?aghendes jilin ?eyen belh Deni ?ijegwedelh?anx belh t'ajegultin nits'il?in jilin ?eyen ?elhghanajadil ?eyed jeyenilhtin. ⁵⁴ Peter ?eyen yaniz yenayalh, yašalhtig ?aghendes becourtyard jiz gwets'en deni neniya. Deni ghajaghetinsh gutuw h tetl'adišdah, qwenagh naxedenilžilh. ⁵⁵ Guyen yašalhtig ?aghendes jilin ?eyen belh chejaghiždil gats'in ?eyen Sizi ch'ajeyedulax jeyenižen gweqa ?inlhetah guntsen ?ajagh jeyughutan qa?ajet'in, gan lha nendidah bid jeyenentuyud gual. ⁵⁶ Deni lhan juts'id jid jeyanagwalnig gan lha ?elhqa?agwedini.

⁵⁷ Belhdan ?eyen nijedindil hink'an nenduw h gajedinh jid jutizts'id, ⁵⁸ "Nenduw h gadinh xuzaghilts'an, 'Sid nenjan Gudinit's'il?in bequngh denila bid ?ets'egunlagh ?eyed nanagwedenaghigganž ch'iz tad dzin ghinli lha denila bid hilih ninagwedetastlelh, nih," jedinh. ⁵⁹ ?Eguh chuh lha ?elhqa?agwedini.

⁶⁰ ?Eguh hink'an
yašalhtig ?aghendes
?eyen deni nadas
nininyah. Sizi lha
yanilil gwech'ez
yudelhqed gadinh,
"Xugunlht'i
hajedin nenden
deni nenjan
nanajegwelng
?eyen, xunlht'iq
lha
xudežinlnish?"



*Yašalhtig ?aghendes, Deni ?ijegwedelh ?anx
belh Deni t'ajegultin.*

⁶¹ Gan lha yets'en tijish. Lha xuyelhdinil. Shunchuw
yašalhtig ?aghendes nayudelqed, gayelhnih, "Nin
telah, Gudinits'il?in bets'enz xaghinyah hanint'ih,
Gudinits'il?in dežilti ?eyen beyi ninlin telanint'ih?"

⁶² Sizi gayelhnih, "Sid hast'ih; Deni gudes
xaghinyah chuh helin, ?eyen nadint'i, ?eyen
Gudinits'il?in yenalhes tešedah gwenentalh?inlh,
?eyen didagats'i gha?anadetanih gweqa yat'ax gudish
qw'es tuwh nexwananatadalh gwenentalh?inlh."

⁶³ ?Eyed hink'an yašalhtig ?aghendes lha gwanilil
gwech'ez bets'enz tižganž hink'an nenduw gadinh,
"Lha jeyagwelng ?eyun naxughut'in hat'ah.

⁶⁴ Gudinits'il?in ts'en gwaghax jid yaghinlhtig²⁸
xuzaghalhts'an. Xuyenelhžen?"

"Ch'ats'edelax dzanh jidaltšen," jedinh. ⁶⁵ ?Eyed
hink'an belhdan jeyunentizi hink'an jeyenagh
qedenilh?un hink'an ?inlhanx liny yulhchinsh
hink'an jeyudilhqig, "Nendan hajagh?" Sulješ
jeyunaghinqad hink'an ?ananajeyešdin.

Peter xedunišdžin.

⁶⁶ ?Eguh gughad Peter guyax courtyard nayah. ?Egu
ts'iqi, yašalhtig ?aghendes nadat'in ?inlhanx xaghelgay.

²⁸ 14:64 2:7 belh 3:28,29 chuh gweninlh ?in.



Peter nalgwen.

ʔegu lusdes ʔadaghini.

⁶⁹ Ts'iqi nenk'eyen ʔeyed nazed yinlhtsan, gweghex najedilhyah ʔeyen guts'en ganadedinh, "Nenden deni Sizi yixudaghinten hant'ih."

⁷⁰ Peter chunchuh xedigwenisdzin.

ʔAghal ghili, guyen gughen najedilhyah ʔeyen Peter gajeyelnih, "Nenk'ed ʔinlhes Sizi bixudaghinten hanint'ih. Galilee gwet'in hanint'ih."

⁷¹ Shunchuh, "Lha gast'ih," nih.

"Gudinit's'il'in jinasenuhtanx lha ʔahʔadezesnih hink'ed, nenden lha sas'in ʔeyen halhahnih," nih.

⁷² Najizah gwet'agwediʔan lusdes enduwah nad ʔadaghini. Peter, Sizi xuyelnih ʔeguh jinaghelni, "Lusdes lha nad ʔadesnih danh tad lha sezaghin'in detaghanilh."

ʔEyed hink'an bedzi denisdagh, gunchagh jid ghintsagh.



Peter shunchuh xedigwenisdzin.

⁶⁷ ʔEyed Peter nalgwen yinlhtsan. Sutsel yenaghilh'in hink'an gadin, "Nin chuh Sizi Nazareth gwet'in bixudaghinten hanint'ih."

⁶⁸ "Lha gast'ish. Lha did ghanyalhtig chuh ʔegweyenesen hadinish," yelnih. Hink'an tigweniʔah ʔeyed nininyah,



Peter xedigwenisdzin.

15

Sizi Pilate beneš naghinzed.

¹ Egwilhqan ?abenax danh guyen yašalhtig ?aghendes jilin ?eyen belh t'agultinqi jilin ?eyen belh Deni ?ijegwedelh?anx, ?eyen hink'an deni belh tejedilhts'ish gats'in ?eyen, xugwetalht'ilh ?eguh ?elhelh nijegugheni?an. Sizi bela ts'elghil hink'an gwants'etilhtin, ?eguh hink'an Pilate ts'edinh ?eyen betl'ajeyaghilhtin. ² Pilate yudilhqed, "Nin, Jews gubeking ninlin hanint'ih telany?"



Sizi Pilate bed nazed.

Sizi gadinh, "Ha?anh, ?eguh gast'ih hadinih."

³ Hink'an guyen yašalhtig ?aghendes jilin ?eyen lha?agulha gwaghex ta?anašt'in xadajegwedilhdil.

⁴ Pilate shunchuw h yudilhqed, "Gagulhan gwaghex ta?anašint'in jedinh ?eyed gwa lha xudetežaghanlnilh telanint'ih?" ⁵ ?Eguh chuh Sizi lha gwantijish gwech'ez Pilate lha yanilil.

⁶ Gunchagh dzin Passover nagwežig deni ?inlhanx ganendan qungh nenchagh šedah jeyuzin ?eyen bits'edetalghelh jegughilh?an. ⁷ Gademen teš jaghedulstilh qa?ajet'in gweqa qungh nenchagh jedilhts'ish ?inlhanx Barabbas ts'edinh ?eyen deni ch'ats'edinlagh belh ?agwat'in. ⁸ Jalan Pilate jeyixughizdil hink'an gajedinh, "Ganexwilh?insh ganexughunlax."

⁹ Pilate gagubelhnih gubudilhqed, "Jews gubeking bidetašghelh gutah't'anx tesanh?"

¹⁰ Deni lhan Sizi, yaŝalhtig ʔaghendes jilin ch'a yadi jeyilhʔin, ʔeyed su gweqa jegughinlhts'i gwech'ez Pilate betl'ajeyaghilhtin. Pilate chuh ʔegweyenizen. ¹¹ Gan yaŝalhtig ʔaghendes jilin, deni tuwh nanajelhgay, "Barabbas ʔeyen bits'edulghalh duhni," jedinh.

¹² Shunchuwih Pilate gubudilhqed, "Nexweking ts'edinh ʔeyen xutasdlilh?"

¹³ "ʔElhinilhjes ch'ed jits'ebedulht'is dinih," jedinh jenijedetsig.

¹⁴ Hink'an Pilate gagubelhnih, "Dideqa, xulht'i jid gwaghex taʔanaŝt'in?"

ʔEguh chuh jenijedetsig, "ʔElhinilhjes ch'ed jits'ebedulht'is dinih." ¹⁵ Saʔagunt'ih jid gwadanijužed gweqa Pilate, Barabbas guts'en yidalghel. Sizi ʔeyen ts'ughelhtsaŝ qaʔayinlagh. Hink'an ʔelhinilhjes ch'ed jits'ebedulht'is gweqa deni julht'ax gajint'en belhdan gutl'ats'aghinlhtin.

*Sizi ʔelhinilhjes ch'ed
jits'ebedulht'ez.*


¹⁶ Sizi gugun Pilate bequngh ʔeyed Praetorium ts'egwedinh ʔegun nendajeyenilhtin hink'an deni julht'ax jalan ʔeyen chejuwedilh gweqa guqajets'aghinish.



Roman suljes.

¹⁷ Ts'enz nenaž disch'enz jid deldel ʔijeyaghinlhtin hink'an xwes chenmal betsi ghad gwet'in ʔeguh gangu jeyelhʔul lajeyilagh jid najeyenilhwed ʔeyi betsi najeyedaghiʔan. ¹⁸ Nenduwih gajeyelhdetižni, "Jews gubeking ninlin, sex denighunli texant'a." ¹⁹ Hink'an ʔelhch'iz dechen bid betsi ts'ughilht'i, jeyudenaghizi, hink'an gubetsigwed bid najedilhyah jid yadi jeyinhʔin

jaghedilʔin taʔajatʔin. ²⁰ Jeyanagwelhyah chʔiz tsʔenz nenaʔ dischʔenz jid deldel ʔeyi binatsʔedilah hinkʔan xeded betsʔenz binatsʔaghilhtin. Hinkʔan gugun guʔanwh ʔelhinilhjes chʔed jitsʔebedetalhtʔes ʔegun gwechʔatsʔeniluy. ²¹ Deni ʔinlhanx nen Cyrene deni Simon tsʔedinh, Alexander belh Rufus gubeta ʔeyen gubeghex xaghelgay, qwentex gwetsʔen ghelgish. Lha gayeniʔen gan ʔelhinilhjes detutan qaʔatsʔilagh.



Sizi ba ʔelhinilhjes tsʔedetiʔtan.

²² Sizi, Golgotha tsʔegwedinh (deni tʔsigwen jitsʔegusih) ʔegun tsʔeniluy. ²³ Tu nentsen, dechen dzax myrrh tsʔedinh belh ʔelhtuwh ʔantʔih ʔeyi batsʔulhchud qaʔajatʔin, gan lha guchʔa yidinl.



Sizi belh deni tsiny ʔelhinilhjes chʔed jigutsʔedilhtʔez.

²⁴ ?Elhinilhjes ch'ed jits'ebedilht'ez ch'iz bets'enz nendan yulhchud gweqa ?ets'enentaghilh?og. ?Eguh jid bets'enz ?elhtex xanats'ešdiny.



Sizi bets'enz qa ?ets'enentaghilh?og.

²⁵ Sa tedi?an gagujagh ?elhinilhjes ch'ed jits'ebedilht'ez. ²⁶ Tl'estil ch'ed "Jews gubeking helin," gwedinh jits'egwedi?an ?eyed gweqa nats'enizud gwedinh. ²⁷ Denitsiny deni ghaxejenedzish gajint'en nandih ?eyen chuh ?elhinilhjes ch'ed jiguts'ebedilht'ez. ?Inlhanx Sizi be?instl'ans hats'inlagh, ?inlhanx ?eyen benalhes. ²⁸ Gudinit's'il?in bets'enz destl'es ?ats'inlagh bech'ed gagwedinh ?eguh gagujagh. Denitsiny ch'ih xusdzin. ²⁹ Nendan jeyeghex telgish ?eyen guntsen jid jeyuzish. ?Ajanilh jid tsijelghilh hink'an nenduw h gajedenish, "Nin

hadaghini 'Gudinit's'il?in bequngh chugh nanagwedenaghigganz hink'an tad dzin ghili ninagwedetastlelh,' dinih.

³⁰ Ganinsun hink'ed jighanexwenilhten, ch'adughunax ch'a xedelh ?anandanx, ?elhinilhjes ch'ed nanandash!"

³¹ Yašalhtig ?aghendes jilin belh Deni ?ijegwedelh?anx chuh ?elhts'en su gajedinh, "Deni lhan belh ?aghet'in gan xeded lha jid xedelh?aŵet'in guyah.



*Yašalhtig ?aghendes belh
Deni ?ijegwedelh?anx
?eyen chuh jeyets'en
?ajanilh.*

³² Nudughudlanx gweqa nenden Gudinit's'il'in bets'enz xaghinyah Israel gwet'in gubeking helin 'eyen, 'elhinilhjes ch'ed gwet'aweya." Guyen belh 'elhinilhjes ch'ed jiguts'ebdilht'ez 'eyen chuh gulh 'agwedaghini.


³³ Džanaš gwatish tad neghedelt'ex gwets'en nenqay gagulhchugh tsalhyah gwalts'ed. ³⁴ Tad neghedilht'i Sizi jeni bid nenduw h gadinh, "'Eloy, 'Eloy, Lama sabaxtani!" Nenqayni ch'ih 'eguh nenduw h gadinh hadaghini, "SeGudinit's'il'in, seGudinit's'il'in, dideqa sech'an nadežinyah."

³⁵ Deni belhdan gughen najedilhyah 'eyen jeyedežts'an hink'an gajedinh, "'Eshenishjed, Elijah yeqajenish." ³⁶ Deni 'inlhanx yets'en hentled hink'an nentses gant'i, tu nentsen ts'elqen 'itanayedilhqed 'eyi dechen dinaž belangh gughedenetsox ghayedenilhtan, 'eyi Sizi yudan gweqa yets'en tiyebedenilhtan hink'an gadinh, "Gwedu'aghut'i. Elijah gwet'anayetalhtilh, gwenughul'in tesanh."

Sizi ch'adejagh hink'an sunits'enilhtin.

³⁷ Hink'an Sizi gwechugh 'adaghini, 'egu 'ech'ilh'ah xanadagheji.

³⁸ Gudinit's'il'in bequngh chugh gwatish manda heštl'un detan hesbes 'eyi, gudes ts'en xaghindlad 'inlhes yayax 'elhts'ighindlad.



Gudinit's'il'in qungh jiz hesbes 'eyi 'elhts'ighindlad.

³⁹ Deni julht'ax
gha'anadeni ?eyen Sizi
yenadas nažed, benalh
?ech'ilh?ah xanadagheji
gwenaghinh?in, gadinh,
"Nenden deni ?inlhes
tš'idaneš jid
Gudinitš'il?in beyi
haghint'i."

⁴⁰ Tš'iqi belhdan lha
gwechugh gwech'adižad²⁹
jegwenilh?in najedilhyah,
Mary, Magdala qwentex
gwet'in, belh Mary
nenden gube?inkwel helin, James K'anighelilh
ts'edinh ?eyen belh Joses, hink'an Salome denituwh
nayedilhyah. ⁴¹ Nen Galilee tš'iqiqi Sizi jeyenadadelnih
gweqa najeyeniždil. Tš'iqi ?eyun jalan Sizi belh
Jerusalem qwentex jenindil ?eyen chuh ?eyed najedilh.
⁴² Dzin gunchagh dzin talax ?inlhed dzin jid gwech'an
gwa xenats'edet'insh ?eguh xelhyiz tižli, ⁴³ Joseph
qwentex Arimathea deni ?aghendes tejedilhtš'ish
?inlhanx helin. ?Aghendes tejedilhtš'ish ?eyen
jeyet'ayenintan. Xeded chuh ?inlhetah Gudinitš'il?in
gwa'anadetanilh gwanagughinžed gwedu?ant'ih. Lha
niljed chu Pilate yets'en helgay, hink'an Sizi bedatsagh
qanajadiny.

⁴⁴ Pilate ?aghal ch'ats'edejagh ?eyed lha gwanilil.
Deni julht'ax gha'anadeni ?eyun qajaghini hink'an
gweqa yudilhqed. ⁴⁵ Deni julht'ax gha'anadeni ?eyen
yets'en tš'idaneš gwelhtsin ?eguh hink'an Sizi
bedatsagh nawelchud ts'edinh.

⁴⁶ Joseph layan ts'et'an dižti xughinqid. Datsagh
nanayaghinlhtin, ?eyi yech'inayedizdež, tš'iny gulin



Sulješ gha'anadeni ?eyen.

²⁹ 15:40 K'es gwech'adižad.

ʔeyed tʂiyi gwenits'egughinlah ʔegun gweyi
suniyenilhtin. Tʂi chugh gweqanajedenilmel.



Tʂiyi gwenits'egughinlah ʔegun sunits'enilhtin.

⁴⁷ Mary qwentex Magdala gwet'in helin belh Mary
Josés beban ʔeyen nents'in nijeyenilhtin
jegwenaghilhʔin.

16

Sizi naguʂdiny.

¹ Nats'etejish gwadzin xengwedijagh, Mary qwentex
Magdala gwet'in, belh Mary James beban hink'an
Salome ʔeyen, Sizi bedatsagh jutlez jeyenižen gweqa
sultsen bid ts'enetlez gant'i jughinqid. ² ʔAbenax danh
su ʔech'an dzin sa k'an dzhagh xaghiʔan ch'iz tʂiyi
gwenits'egughinlah gwets'en najeghadanlh.

³ "Nendan tʂi gweqats'edenilmel ʔeyi
nexwagwadenentalhmelh?" jedinh nelhjudelqed.

⁴ Sutsel ?egun nanajet'is, yedanx tsi gadenilhchugh ?eyi nendagweni?ah gwech'ež deniž?an jegulhtsan.



Tsi chugh yedanx gwedex gwech'ež deniž?an.

⁵ Tsiyi gwenits'egughinlah ?egun k'an dzanh nendajaghetižnan ?egu, deni k'anighelilh lhek'el be?ant'ih nalhes ?egwenz tešedah jinlhtsan; jenilhjud hink'an lha gwanijilil. ⁶ ?Eyen gagubelhnih, "Lha gwanihil hanh; lha nilhjed hah! Sizi qwentex Nazareth gwet'in ?elhinilhjes ch'ed jits'ebdilht'ez beqah?is ?eyen lhagul xungh. Nagušdiny ninadijah xungh. Guyed ghinlhti ?eyed gwenilh?in.

⁷ Gan ch'ih natuhdil, Peter hink'an jeyelhnašedil ?eyen gagubelhduhni, 'Sizi Galilee gwets'en nexwech'an tayalh, ?eyed nentalh?inlh, gwech'an danh ganexwelhnih ghinli.'" ⁸ Jedilhteš, jenilhjud gwech'ež tsiyi gwenits'egughinlah tijagheninan tsijaghetilhnan. Jenilhjud gwech'ež lha deni ?inlhanx belh jegulnish.

Mark nenjan gwets'en nigwelnig. Hink'an deni ?eyun nenjan gu?en nagwalnig.

⁹ ?Egu ?ech'an dzin lha yelhqex danh Sizi nagušdiny ninadijah ch'iz, Mary qwentex Magdala gwet'in nentsen ?inlhed ch'ilhghilh ganilt'ih yixadanizud ?eyen sid yixediltsan. ¹⁰ Nenk'eyed danh jeyelhnašedil

Sizi beqa gudzi denidah gwech'ez jetsagh ?eyen gutuw h xanalhgay gagubelhni h gulh nagwalnig. ¹¹ Sizi nagušdiny ch'iz yenaghilh?in nih gan bets'uts'edišlan.



Nendajagheninan ?eyed ližanš jinlhtsan.

¹² ?Eguh ch'iz jeyelhnašedil nandinh qwentex gwech'adenižad jeghanalh, guba ?ets'en jinił?in xedelhtsin gubixedenaghel?in. ¹³ Jeyelhnašedil ts'en najaghindan hink'an denilh najegwalnig, gan ?eyen chuh guts'uts'edišdlan. ¹⁴ ?Eguh ch'iz ?elhch'ažnan gu?en ?inlhanx ?eyen, nejedan gubixedenaghel?in; lha jegudidlan jid gutsi denaghints'i. Nagušdiny ninadijah gaguts'edinh gwets'ujedišdlan gweqa gulh yaghinlhtig. ¹⁵ Gagubelhni h, "Nenqay gagulhchugh denits'ilin ?eguh sanagwelhnig na wehdilh.

¹⁶ Ganendan set'ayenetan hink'an tubi?ats'inlagh ?eyen detajish; ganendan lha set'ayenitan ?eyen tsidetayalh.

¹⁷ Nendan set'ajeyenintan ?eyen: Sughuži bid nentsen deni ?ixadajenentayud; gaganlhanwh gwech'ih yajetalhtig; ¹⁸ Gula bid tl'ughešen najetalalh; pazen jetišdan ?eguh chuh lha xujetalhni h; hink'an deni jedenidah ch'ijedilni ?eyen sa?anajetadinlh."

¹⁹ ?Eguh gagubelhni ch'iz, Sizi³⁰ gudish
guts'aghinlhtin ?egun Gudinit's'il?in benalhes
tetl'adišdah. ²⁰ Jeyelnašedil ?eyen Sizi jeyanagwelni
gagulhchugh gwech'ijedaghindil, ?Anadeni gagulhnaž
gulh ?aghet'inlh hink'an lha gubanit's'ešdlis jid
suta?anajet'in gwech'ez gubuts'edidlan hajaghint'i.
Nenk'eguh dzanh.



Sizi gudish nench'ez natiszah.

³⁰ 16:19 Nenduwh su gagwedinh, ?Anadeni Sizi.